

文獻叢編

第十一輯

故宮博物院文獻館出版物廣告

掌故叢編（一至十輯）每輯五角

史料旬刊 每期四角

名教罪人 一冊五角

讀書堂西征隨筆 一冊（清汪景祺著）

粉紙每冊六角
毛邊紙每冊五角

鈐拓故宮寶譜 一冊叁元

影印交泰殿寶譜 一冊壹元

影印籌辦夷務始末 道光朝全書四十冊售價二十四元咸豐朝全書四十冊
售價二十四元同治朝全書五十冊售價三十元

清雍正硃批諭旨不錄奏摺總目 一冊壹角

清軍機處檔案目錄 一冊叁角

文獻叢編第十一輯目錄

圓明園模型之一

鞏昌府印

清嘉慶二十一年英使來聘案續 西紀一八一六年

清康熙祿批諭旨續

曹寅子連生奏曹寅故後情形摺

江寧織造主事曹顯奏謝繼任江南織造摺

江寧織造主事曹顯奏李煦代任鹽差補完虧欠情形摺附單一件

江寧織造主事曹顯奏請進鹽差餘銀摺

江南織造主事曹顯繼任江寧織造謝恩摺

江寧織造主事曹顯代母陳情摺

江寧織造主事曹顯奏捐銀兩以供軍需摺

江寧織造主事曹顯奏報總督赫壽丁憂百姓環請保留情形摺

江寧織造主事曹頌奏進晴雨錄摺

江寧織造主事曹頌覆奏家務家產摺

江寧織造主事曹頌奏二次種稻不實緣由摺


江寧織造主事曹頌奏御賜普濟寺匾額代民謝恩摺 附殊諭

江寧織造主事曹頌奏遵旨照看熊賜履之子情形摺


清雍正朝關稅史料 續

違礙書籍單 續乾隆四十二年八月湖廣總督三寶查繳

→ 之 型 模 園 明 國



鞏昌府印說明



鞏昌府今甘肅隴西縣印銅質形體大小與照片相同藏清內閣大庫爲吳三桂周元年（清康熙十三年）禮科所造蓋三桂舉兵後王輔臣嚮應於陝甘此印或係三桂頒給王輔臣者按康熙十三四年實錄中每有奪獲吳三桂僞文僞印之事則此印或係當時奪獲品之一也

賜遊萬壽山何人應與何人不應與著蘇楞額與廣惠向該譯生詢問伊等職分大小酌定人數先行具奏以便備賞正貢使之子貴米斯阿美士德年歲幾何有何技藝一併詢問具奏再俟該國貢使到天津後蘇楞額與該貢使等叙言時以該國王此次入貢甚屬恭順伊等於正月自該國起程六月已抵天津行走亦為迅速上次該國貢使入貢禮成後由浙江廣東回國路途遙遠甚覺勞苦此次禮成後仍由天津登舟計年內即可回國較為便利察其詞氣自必樂於順從亦即據實奏聞將此諭知蘇楞額並傳諭廣惠知之欽此遵旨寄信前來

工部尚書蘇楞額
長蘆鹽政廣惠覆奏詢問暎咭喇國貢使隨員職別摺

清嘉慶二十一年閏六月
滑軍機處存檔

奴才蘇楞額廣惠跪奏為遵旨詢問暎咭喇國貢使等各情形恭摺覆奏仰祈聖鑒事閏六月十二日接奉軍機大臣字寄內開嘉慶二十一年閏六月十一日奉上諭廣惠奏傳問暎咭喇國譯生情形並將貢使正從各名目開單呈覽

朕閱單內筆帖式兼譯生米斯端等四名筆帖式係屬滿洲官名上次喚咭喇國來使及從人內均無此名目此次何以忽有此名著蘇楞額廣惠向該國譯生詢明具奏再正使之子年幾歲有何技藝亦詳悉具奏其單開貢使正從人數已不爲少將來進京之人即在此數內可減不可加若該貢使等仍欲增添亦不過一二名勿許再多其該國貢船留存官役兵丁水手亦查明實數先行具奏以便備賞發給該貢使到津筵宴後其行禮諭筵情形屆時詳悉奏聞彼時即可計算到園日期如該貢使能於本月二十一二等日到園距齋戒日期尙遠一切典禮均可舉行倘遲至二十七日係朕進宮齋戒之期例不筵宴又不便令該貢使等閑居等候著即於七月初一二日到園排日瞻覲筵宴並賞遊萬壽山爲期亦甚從容也將此諭令知之欽此又於十五日接奉軍機大臣字寄內開嘉慶二十一年閏六月十三日奉上諭蘇楞額奏喚咭喇國貢船現在海口以外俟得風便即用內地船隻分載來津等語蘇楞額現已抵天津俟該貢使等登岸後一切遵照前旨妥協辦理昨廣惠奏到該國貢使及正從人

名單內正使一名左右使各一名及該正貢使之子將來瞻覲筵宴聽戲賜遊均應一體與入至所開筆帖式四名又正貢使自用筆帖式一名其官職大小若何查乾隆五十八年萬樹園筵宴時該國總兵官副總兵官通事代筆醫生管兵官聽事官管船官八名均曾與宴此次單內官名又與前次不同其筆帖式及圍兵武官圍兵二武官雅文學等如同樂園聽戲賜遊萬壽山人應與何人不應與著蘇楞額與廣惠向該譯生詢明伊等職分大小酌定人數先行具奏以便備賞正貢使之子貴米斯阿美士德年歲幾何有何技藝一併詢明具奏再俟該國貢使等到天津後蘇楞額與該貢使等叙言時以該國王此次入貢甚屬恭順伊等於正月自該國起程六月已抵天津行走亦爲迅速上次該國貢使入貢禮成後由浙江廣東回國路途遙遠甚覺勞苦此次禮成後仍由天津登舟計年內即可回國較爲便利察其詞氣自必樂於順從亦即據實奏聞將此諭知蘇楞額並傳諭廣惠知之欽此奴才等業將本月十一日海船出口分載貢物因風色不順貢使等不能進口垂詢各情未能面問及貢物貢

使約於月底可以到京於十五日先行恭摺奏蒙聖鑒連日陸續接進照料前行於十九日始將所進貢物三十九款共大小五十二件運至天津其貢使人等前單開七十五名據譯生瑪禮遜口稱貢使人等萬里航海志切觀光斷不敢比上次人數加增現開各名懇求附准隨將軍開應進內地貢使等名送至天津奴才蘇楞額廣惠當即派員妥爲照料供頓即遵旨向該譯生瑪禮遜詢問此次朝覲貢使單內有筆帖式名目筆帖式係滿洲官名上次無此名目此次何以有筆帖式兼譯生官名據云上次入覲時有筆帖式官照看聞悉能書寫文學之官因仰慕官名是以譯生上加寫今蒙詢問實覺冒昧書寫請去筆帖式名目仍名譯生奴才等問正貢使之子貴米斯阿美士德年幾歲有何技藝據云現年十四歲並無技藝實係景仰天朝威儀制度隨同瞻覲得沐聖恩奴才等問正副貢使人等前單共七十五名已經奏明大皇帝格外天恩均准令進京此外留存海船官役兵丁水手尚有若干人查明轉奏恭候大皇帝施恩賞賚據云單開貢使等七十五名既准進京所有存留海船官役兵丁水手

人數尙多約有六百餘名一時不能算清總求大皇帝恩典奴才等間單開筆帖式自用筆帖式圍兵武官圍兵二武官雅文學及醫夫守各貢物協守貢物等均係何官上次朝覲貢使內總兵官副總兵官通事代筆醫生管兵官聽事官管船官均蒙恩賜宴此次單開各名職分大小若何據云喚咭喇國官與天朝官不同並無品級惟分官職大小前開名單次序即是官職大小次序自用筆帖式係正使自用之官正使之子先生係隨正使之官雅文學如同天朝欽天監之官醫夫卽是醫生守各貢物協守貢物係因此差派來之人卽是有官職的等語奴才等聽其言詞尙無支飾隨同至貢使等現住船隻該貢使等相見頗知進退禮數奴才等先行勞慰恭宣聖諭該國王此次入貢甚屬恭順天津賞汝等筵宴聽戲到京後瞻覲筵宴聽戲賜遊陞辭賞賚疊沛恩施並宣諭貢使等此次行走迅速將來禮成後若照上次由浙江廣東回國甚覺勞苦仍著由天津登舟回國較爲便利奴才等隨告知遵旨定於本月二十日在天津城內道署筵宴聽戲以便起程進京該譯生瑪禮遜將所問各情及恩諭一切

詳細告知正副貢使該正副貢使等告知該譯生轉云皆係大皇帝恩典又派大人來照應心甚不安奴才等察其言動詞氣甚屬恭順其懷德畏威已形於色惟於告知仍由天津回國一節據云總是大皇帝恩典只求多住幾日瞻仰天朝更深感激等語謹將奴才等詢問各情先行據實奏聞再十八日接奉閏六月十七日欽奉諭旨奴才等跪讀之下仰見皇上聖明洞照體卹周至欽佩無地俟奴才等恭率該貢使等筵宴畢其行禮諭筵情形及將來遵旨按期進京赴圓明園並隨從夷官內應與貢使等行禮入筵聽戲瞻仰人數容奴才等按其單開次序詳細酌定明白宣示該貢使等知悉即行分繕清單恭摺具奏伏乞皇上睿鑒謹奏嘉慶二十一年閏六月二十一日

硃批另有旨欽此

嘉慶二十一年閏六月十六日軍機處傳旨 清軍機處存檔

嘉慶二十一年閏六月十六日奉旨現在暎咭喇國遣使入貢該使臣等到京後城內居住會同四譯館城外居住蝎子湖公館著派護軍統領秀寧格布舍

各帶章京十員護軍一百名在於該使臣館舍外晝夜巡查看守嚴禁該夷人等擅自出入不許內地居民私往窺視硃批如不遵者即行鎖拏奏交刑部治罪其赴禮部筵宴時並著該護軍統領帶領章京護軍等嚴行彈壓用昭整肅欽此

嘉慶二十一年閏六月十七日廷寄 清軍機處存檔

軍機大臣字寄欽差工部尚書蘇傳諭長蘆鹽政廣惠嘉慶二十一年閏六月十七日奉上諭蘇楞額等奏喚咭喇國貢使約於月底可以到京等語喚咭喇貢使既約於月底可以到京著蘇楞額等即照料該貢使按期行走於二十八日到海澱在蠅子湖公館居住昨已有旨派出秀寧格布舍各帶章京十員護軍一百名在館舍外巡查看守蘇楞額等將該使臣等安頓妥協後伊二人卽於是日下晚進城二十九日預備召見朕於初一日至圓明園時該使臣等俱令在館靜候不必帶至蹕路瞻覲初二日令於正大光明殿進表禮畢帶至同樂園聽戲初三日於正大光明殿筵宴禮畢仍帶至同樂園聽戲初四日帶至萬壽山園亭瞻仰初五日令其陛辭是日蘇楞額廣惠帶領該使臣等入城在

會同四譯館居住初六日在太和門頒勅領賞後即赴禮部筵宴仍回四譯館居住初七日即令出京蘇楞額送至城外廣惠帶同該使臣至天津少憩一二日即令登舟回國似此分定日期一切禮節蘇楞額等於會晤該使臣時即先行告知如該使臣悉皆樂從甚善若稍有異說蘇楞額等當委曲開諭務使遵奉倘有必不遵依之處即據實奏聞再此次在天津筵宴蘇楞額廣惠當身率該使臣一同謝宴行禮該使臣若恭順隨行先將情形具奏其來京後該正副使臣及正使之子並隨從夷官內於進表之日應行入內行禮者幾人同樂園應帶進聽戲者幾人筵宴之日應入座者幾人萬壽山瞻仰之日應帶入者幾人陛辭之日入內行禮者幾人禮部筵宴應與宴者幾人均著蘇楞額等詳詢該夷官等品級等差擬定人數開列清單務於二十八日以前奏到以便預行飭知各該處分別供備將此諭知蘇楞額併傳諭廣惠知之欽此遵旨寄信前來

軍機大臣字寄欽差工部尙書蘇嘉慶二十一年閏六月二十日奉上諭據董
教增等奏查明啖咭喇國貢船大小共五隻正貢使係囉嗎啊啖吐噠副貢使
係啖哩嚙連副貢使啖噤共三員於六月十九日自老萬山外香港洋面開
行向東經由浙洋駛往天津等語此次啖咭喇國貢船過粵者共五隻與抵津
船隻數目相符正使名字與廣惠前奏亦屬相符惟廣惠前奏單內左使係男
爵西雅治斯當東右使係米斯威利依禮士今董教增等所奏副使啖喇嚙啖
嚙噤次序前後不同廣惠所奏斯當東名上增西雅治三字依禮士名上增米
斯威利四字亦覺稍異其餘貢使之子及筆帖式等名字上多有加米斯二字
者著詢問該譯生米斯二字係該國何語其副使啖噤是否即係乾隆五十
八年副貢使之子若係其人蘇楞額自必認識啖噤噤在粵年久諳習中國語
言如有應行詢問之處均可向其面詢或行禮時有儀節舛錯之處並可以五
十八年舊儀向其結責自當敬謹遵循現在該貢使等曾否渡至天津一切遵
照昨降諭旨按期伴送來京俱著先行覆奏將此諭知蘇楞額並傳諭廣惠知

之欽此遵旨寄信前來

軍機處奏片

大學士臣董等謹奏爲遵會議具奏事竊臣等欽奉諭旨今將啖咭喇國使臣進表並次日筵宴該使臣及第四日該使臣陛辭各儀注會議具奏臣等謹公同酌擬分繕儀注清單恭呈御覽伏候訓示謹奏嘉慶二十一年閏六月二十日奉旨依議欽此

軍機處擬啖咭喇國貢使進表儀注

清嘉慶二十一年閏六月二十日
清軍機處存檔

是日寅刻預陳法駕鹵簿設中和韶樂於正大光明殿簷下設丹陛大樂於出入賢良門內兩旁應行入坐之阿哥王及使臣等預於殿內鋪設坐褥卯初恭請皇上御龍袍褂陞正大光明殿阿哥王及執事官員俱穿蟒袍補褂御前大臣侍衛乾清門行走王公侍衛在殿內分兩翼侍立領侍衛內大臣帶領豹尾鎗長鞭刀侍衛亦在殿內分兩翼侍立阿哥王及記注官咸於殿內侍立中和韶樂作奏陞平之章前引大臣恭引皇上陞座樂止鑾儀衛官贊鳴鞭塔下三

鳴鞭丹陛大樂作奏治平之章臣蘇楞額臣廣惠同禮部堂官一人欽天監堂官一人帶領喚咭喇國正副使臣等恭捧表文由出入賢良門右邊門進至正大光明殿月臺下甬路之西鳴贊官贊排班該使臣等排班立贊跪該使臣等跪樂止贊進表正使臣捧表恭遞臣托鄂勒哲依圖恭接表章由中路行走至殿內地平下跪獻臣綿恩接捧由中踏蹀至御前跪遞皇上受表後臣蘇楞額等帶領正副使臣等由西福扇進至殿內地平下跪候皇上親賞該國王如意臣綿恩接交該正使傳旨存問畢臣蘇楞額等將該使臣等帶出西福扇外臣蘇楞額代該正使恭捧如意仍將該使臣等帶至月臺月甬道西邊鳴贊官贊排班該使臣等排班立樂作鳴贊官贊進跪該使臣等皆進跪贊叩與該使臣等向上行三跪九叩禮禮畢樂止其應入座之阿哥王以次入座卽帶領該使臣等入於西班之後行一叩禮入座皇上進茶阿哥王及該使臣等各於坐次跪行一叩禮茶畢仍就坐侍衛進前分賜殿內列坐之阿哥王及該使臣等奶茶各就坐次行一叩禮飲畢復行一叩禮鑾儀衛官贊鳴鞭阿哥王及使臣等

俱起立階下三鳴鞭中和韶樂作奏顯平之章皇上還宮樂止阿哥王及使臣等俱退出臣蘇楞額臣廣惠再將該使臣等帶至同樂園外邊伺候俟皇上至同樂園陞座將該正副使臣等帶至西邊廊下觀劇賜食頒賞

軍機處擬筵宴曠咭喇國貢使儀注

清嘉慶二十一年閏六月二十一日
清軍機處存稿

是日預設中和韶樂於正大光明殿簷下左右陳清樂於左設丹陛大樂於出入賢良門內兩旁設反坫爵於門內正中內務府大臣視設席寶座前設御筵設領侍衛內大臣暨記注官席於寶座後左右僉向設阿哥王公及頭品滿漢文武大臣並二品文武滿大臣等席於殿內左右及殿東簷下設該使臣等席於殿西簷下卯初恭請皇上御龍袍褂陞正大光明殿阿哥王公大臣執事官員俱穿蟒袍補褂中和韶樂作奏隆平之章前引大臣恭引皇上陞座樂止入座之阿哥王公以下及使臣等以次入座各於本位行一叩禮坐侍衛等恭進宴桌丹陛清樂作奏海宇昇平日之章尙茶正進茶皇上用茶時阿哥王公以下及使臣等各於坐次跪行一叩禮茶畢仍就坐侍衛進前分賜阿哥王公以

下及使臣等茶各就坐次行一叩禮飲畢復行一叩禮樂止展席罽掌儀司官就反玷恭捧靈爵金卮由中路進至殿門外之左西面立丹陛清樂作奏玉殿雲開之章阿哥王公以下及使臣等皆起立二阿哥離席出至殿門外釋補服進至殿內跪阿哥王公以下及使臣等咸於坐次跪掌儀司官舉靈寶酒於爵由中門入西面跪受爵起退二阿哥奉爵由中陛陞由西邊進御座側跪進爵皇上受爵二阿哥起由右陛下復至原跪處跪皇上用酒時二阿哥行一叩禮阿哥王公以下及使臣等皆行一叩禮二阿哥起由右陛陞跪受爵仍由中陛下至原跪處跪掌儀司官進跪接爵退阿哥王公以下及使臣等先起掌儀司官以金卮酌酒進立賜二阿哥二阿哥跪受行一叩禮飲畢掌儀司官立接卮退回原處二阿哥行一叩禮起退服補樂止阿哥王公以下及使臣等各就坐二阿哥入席坐皇上用饌中和清樂作奏萬象清寧之章恩賜食品尚膳等進內饌恩賜肉饌畢進反玷樂止御前大臣起視侍衛巡酒一次阿哥王公以下及使臣等均於坐次行一叩禮飲畢復行一叩禮坐時簷下進蒙古樂歌塔下

進善樓十對出入賢良門內後簷階下演劇皇上御宴桌撤丹陛大樂作奏慶平之章阿哥王公以下及使臣等各於坐次行一跪三叩禮禮畢樂止中和韶樂作奏顯平之章皇上還宮樂止阿哥王公以下及使臣等俱退出所有加賞該國王及使臣等物件即行頒給臣蘇楞額臣廣惠仍將該使臣等帶至同樂園預備觀劇

嘉慶二十一年閏六月二十一日廷寄 清軍機處存稿

軍機大臣字寄欽差工部尚書蘇傳諭長蘆鹽政廣惠嘉慶二十一年閏六月二十一日奉上諭據蘇楞額等奏暎咭喇國貢使等七十五名於六月十九日已至天津其單開筆帖式名目係因上次入貢仰慕中國官名一經詢問即自認冒昧請仍改稱譯生具見恭順此後奏單內著即刪去筆帖式字樣改書譯生至存留海船官役兵丁水手等據稱一時不能算清約有六百餘名著蘇楞額等仍飭知該譯生令其查明實數開報先行具奏以便備給賞件現已排定日期瞻觀宴賚所有進表及賞進同樂園聽戲陞辭四次祇准正使左使右使

並正使之子四人恭與至筵宴時於正使左使右使正使之子四人外再添入譯生五名正使之子先生一名圍兵武官一名圍兵二武官一名共十二人俱准與宴其賜遊萬壽山日亦祇准此十二人恭與餘俱不准擅入著蘇楞額即傳知該貢使等敬謹遵依

再樂八一項可減令其回原船等候貢使一同回國

可也將此諭知蘇楞額

並傳諭廣惠知之欽此遵旨寄信前來

嘉慶二十一年閏六月二十二日廷寄 清軍機處存檔

軍機大臣字寄欽差工部尙書蘇傳諭長蘆鹽政廣惠嘉慶二十一年閏六月二十二日奉上諭蘇楞額等奏喚咭喇國貢使於天津筵宴望闕謝恩時祇向上三免冠九拜揖九俯首禮節究有不合俟沿途再行開導俾知順從已定於二十一日帶領起程進京等語

所奏錯誤極矣前派蘇楞額前往天津照料喚咭喇國貢使時曾面諭務將該貢使等禮節調習嫻熟方可令其入覲如稍不恭順即令在津等候毋庸亟亟起程來京今該貢使既不肯行中國禮儀即應奏明候旨乃蘇楞額廣惠竟於十一日帶領起程實屬冒昧蘇楞額廣惠俱著傳旨嚴

行申飭此時蘇楞額等既已登舟惟有向嗣嚙噉詳細開導諭以爾曾於乾隆五十八年隨貢使來至天朝一切瞻覲宴賚禮儀俱經目覩其時先朝大皇帝不准爾國使臣行本國之禮嗣經三跪九叩頭始蒙恩賚駢蕃禮遣回國當今大皇帝事事恪守先朝制度爾等不肯遵行中國禮儀斷不准爾等瞻覲我等亦不敢具奏天朝定制凡屬大小臣工以及外藩如朝鮮越南琉球暹羅南掌緬甸並番回各部落不止數十百處來京朝覲者皆行三跪九叩頭禮從無敢違定制者至於免冠乃有過之禮中國朝見時無此儀文爾可將此言詳細告知正貢使囉哩啊嘆吐噫等令其敬謹順從先將三跪九叩之禮

令我二演
入目覩

習爛熟我等方敢帶領進京倘執意不從我等不敢具奏貢品亦不能賞收一切宴賚恩榮俱不能邀卽由此處將爾等送回原船歸國爾等航海遠來豈非徒勞跋涉况爾尤非他人可比爾在廣東澳門居住有年熟知中國法度大皇帝既不納貢將正使臣等遣回本國或一時聖怒將爾拘留治罪亦未可定彼時爾豈不後悔如此明白曉諭若該使臣等一一恭順卽令上行三跪九叩

頭禮禮節無愆按程行走來京倘該使臣等虛辭應允並不演習蘇楞額等希圖將就到京將來進表之日行禮仍不如儀彼時將貢使等立刻遣出宮門另派大員押送天津登舟回國定將蘇楞額廣惠革職交刑部治罪以為辦理

不善者戒決不姑息慎之將此由四百里諭知蘇楞額並傳諭廣惠知之與其到京逐回

不若中途轉回為妙朕實不願受此虛譽有損國體也若至爾後日勞唇舌皆汝二人之罪彼時毋悔欽此遵旨寄信前來

工部尚書蘇楞額奏報諭令英使演習禮節情形摺
清嘉慶二十一年
清軍機處存檔

奴才蘇楞額廣惠跪奏為遵旨曉諭開導映唎國貢使據實奏聞請旨事聞

六月二十三日接奉軍機大臣字寄內開嘉慶二十一年閏六月二十二日奉

上諭蘇楞額等奏映唎國貢使於天津筵宴望闕謝恩時云云欽此奴才等

跪讀之下恐懼悚惶莫知所措該貢使等禮節理宜調習嫻熟方可入覲昨於

二十日在天津遵旨筵宴畢即於二十一日帶領起程係奴才等拘泥欽定二

十八日帶赴圓明園蝎子湖公館日期恐有遲誤未經奏明候旨起程今奉旨

嚴行申飭奴才等實屬糊塗錯誤本日即刻將各船停泊到該貢使等船隻面

見羅耳阿美士德西雅治呵嚙陳謹遵聖諭層層開導詳細曉諭恩威並示設法引喻令其演習三跪九叩之禮自辰至午語無不詳據譯生瑪禮遜傳羅耳阿美士德話云貢使等由海外遠來實不敢稍存不恭順之心況天朝定制敢不遵依又蒙大皇帝恩典心中實在感激但不敢私自更改本國禮節將來回國時必然重治我等之罪如今就是不准朝覲不收貢物著令回國雖心中不願又不敢不從再想不出兩全之法惟有求大皇帝憐念海外夷人格外施恩等語據西雅治呵嚙陳云乾隆五十八年來時所有禮節雖經目覩實係年幼不記得惟有感念先朝大皇帝恩典至今猶有收藏恩賞荷包無時不心懷誠敬前所說跪一膝一俯首之禮貢使等所到各國從無行過今情願加行九數並非違背不從三跪九叩之禮實係不敢私改我國王禮節貢使等奉國王之命恭進貢物倘不蒙賞收又不能得大皇帝恩典徒勞回國心中豈不害怕惟求將貢使等恭敬不得已之心轉奏可以得受大皇帝的恩典等語奴才等復諭以汝非他人可比前次來過又在澳門多年豈不知中國法制倘仍推誘必

致聖怒拘囚治罪該貢使別無言語甚覺恐懼奴才等又再四曉諭伊等仍執前說惟有合詞求恩詞色加倍恭敬為難不安始據西雅治呵嚙陳云乾隆五十八年貢使等來朝回國時聞得正使告知國王云係依照本國禮節行禮是以此次不致更改等語奴才等細思其言自係詞窮暫為支飾誠如聖諭與其到京逐回不若中途轉回奴才等斷不敢希圖將就不目覩該貢使等演習三跪九叩之禮率行帶領到園致進表行禮稍不如儀自干重咎現將各船停泊武清縣蔡村地方謹恭摺據實奏聞伏乞皇上聖明睿鑒訓示遵行奴才等不勝悚懼待命之至

硃批若在天津待命毋庸悚懼

謹奏請旨嘉慶二十一年閏六月二十五日

硃批欽此

工部尚書蘇楞額
長蘆鹽政廣惠

奏報存留海外曠咭喇國船私行放洋摺

嘉慶二十一年閏六月
清軍機處存檔

奴才蘇楞額廣惠跪奏為覆奏事閏六月二十二日接奉軍機大臣字寄內開嘉慶二十一年閏六月二十一日奉上諭據蘇楞額等奏曠咭喇國貢使已至

天津云云欽此奴才等於二十日將該貢使等次序名單遵旨酌擬具奏今奉諭旨分定人數理應欽遵預備至該樂人等令其回船之處奴才等卽赴該貢使船隻傳旨令其回船伊等懇求代爲轉奏備准一同進京正在接言之際旋據天津鎮總兵祥啟由海口申報前來據稱曠咭喇國貢使人等於本月十七日自海口陸續開船赴津後該夷船五隻停泊攔江沙外職遵駐海口督飭員弁分派兵丁在于沿海口岸嚴密巡防彈壓不准夷人進口登岸於十八日由地方官備賞牛羊雞鴨果菜淡水等物用漁船裝運卽派把總李成德幫同巡檢張寵送赴夷船十九日據該弁等回稱運送食物交該夷船收領各船並無通事言語俱不能通曉等語二十日差派弁兵乘漁船出口巡探於晚潮進口稟稱攔江沙外原泊夷船五隻不知何時俱已開行等語殊批可惡已極隨立卽分派弁兵雇用漁船於沿海南北查探百餘里並瞭望洋面並無該夷船蹤影似係向東放洋而去或因海口以外水淺另尋水深之處住泊並未據該夷人告知現派弁兵覓大漁船出口尋探一經探有夷船行住蹤跡卽行馳報職仍住

海口督飭弁兵晝夜巡防不敢疎懈等因

殊批

申報前來奴才等不勝詫異

殊批汝二人竟同木偶

隨即當面詢問十九日見時曾面告知汝等大皇帝格外施恩因

汝等恭順行走迅速仍著由天津海口回國可免勞苦汝等尙求多住幾日今

何以並不通知即將海船放行且留船人數汝等會報明尙有官五名兵役水

手五百八十二人何以並不等賞明係有心欺飾

殊批汝二人此時方知遲矣

據云曠咭

喇國船身甚大非深水不能定泊天津外洋水淺實怕大風忽起壞船我國王

靠著大皇帝恩典原擬令貢使等船隻先回粵東等候回國貢使等因登岸時

不知本船可以候半個月或數日所以未將船隻先回粵東的緣故告知這是

我們的不是

殊批實在可惡

此時開船已走必然是因風大之故至留船官役水手

實共有五百八十七名並非假話總求大皇帝恩典等語查此次該貢使等來

朝並無內地通事惟左貢使西雅治斯當東譯生瑪禮遜尙知中華言語是以

連日反覆開導詰問皆是此二人應答奴才等細察貢使諸人外貌毫無不恭

順之處究係海外遠國夷人不甚明白

殊批奸詐欺罔

惟知乞恩自便謹將存留海

口以外夷船私行放洋回粵並詢問實在各情恭摺奏聞伏乞皇上睿鑒謹奏
嘉慶二十一年閏六月二十四日

硃批另有旨欽此

倉場侍郎潤祥陳觀奏報為暎咭喇貢使在通州預備館舍摺

清嘉慶二十一年閏六月
滿軍機處存檔

臣潤祥臣陳觀跪奏為恭摺奏聞事竊臣等於本月二十三日面奉諭旨令於
通州尋覓一寬闊公館給暎咭喇國貢使居住欽此遵即於是日回至通州傳
到署東路同知陳錫熊知州孟封妥商尋覓據該同知等稟稱現接通永河道
業紹本來信已奉欽差大人飭知貢使船到東嶽廟馬頭時仍可在船內住宿
次日登岸起程臣等諭以皇上慈惠遠人無微不至意督令上緊尋覓茲
據查得通州舊城南門內有空民房二處相連共房三十二間相距南門最近
屋宇乾潔堪作公館旁邊另有小房十餘間可令照料之員居住且該處街道
僻靜易於巡查防護又於原定東嶽廟下船馬頭西岸之上尋得空閒木廠一

所院宇寬闊房屋潔淨惟僅止十七間據該同知等稟稱可敷貢使及夷官居住其餘隨從多人或可在船上住宿館舍與船岸相近多派弁兵巡查亦甚便易以上二處臣等親往看視均令糊飾潔淨器具鋪設預備妥協當即詳細備信寄知欽差工部尙書蘇楞額長蘆鹽政廣惠查照辦理酌定一處至貢使住居館舍應派兵丁周圍支搭帳房巡查防護現據通協副將七十一稟稱已派營弁八員兵丁二百名同署東路同知陳錫熊管下兵役八十名隨同晝夜巡查沿途擺隊管押閑人臣等仍一面移知巡視通漕御史嵩安在河路一帶妥爲照料兼派坐糧廳阿成張本枝督同河汛弁兵輪流分往河路彈壓空重船隻分岸行走不致擁擠以昭整肅所有臣等查有館舍妥爲預備緣由理合恭摺覆奏伏乞皇上睿鑒謹奏嘉慶二十一年閏六月二十六日

和世泰穆克登額奏俟喚使抵通州後再行剴切宣示摺

清嘉慶二十一年閏六月
清軍機處存檔

奴才和世泰穆克登額跪奏爲奏聞事竊奴才和世泰等欽奉諭旨於二十五

日行抵通州是日亥刻接奉軍機大臣字寄內開嘉慶二十一年閏六月二十
五日奉上諭本日蘇楞額等奏曉諭開導喚咭喇貢使仍執前說等因欽此遵
旨寄信前來奴才等當即由水路起程遵旨迅速迎往於二十六日行抵武清
縣屬大湖口地方適蘇楞額等帶同該國貢使船隻前來蘇楞額等船隻距貢
使船隻甚遠奴才等當即接見蘇楞額等向奴才等商酌附近地方並無寬大
房間礙難令該貢使等住宿演禮且詢之地方官面稱距通州較近仍擬到通
州再行安置住宿公館因時已天晚蘇楞額等擬俟該貢使等船隻到時即行
停住奴才和世泰等即先回通州後於二十七日丑刻奉到軍機大臣字寄內
開嘉慶二十一年閏六月二十六日奉上諭昨據蘇楞額等奏現將各船停泊
武清縣蔡村地方是以降旨令蘇楞額等即將該貢使在武清安頓等因欽此
遵旨寄信前來奴才和世泰等應俟該貢使等行抵通州安置妥協後再行遵
照前奉諭旨作爲己意剴切宣示謹將兩次奉到諭旨及奴才等回住通州緣
由理合先行奏聞伏乞皇上睿鑒謹奏嘉慶二十一年閏六月二十八日

硃批知道了欽此

嘉慶二十一年閏六月二十四日廷寄 清軍機處存檔

軍機大臣字寄欽差工部尙書蘇傳諭長蘆鹽政廣惠嘉慶二十一年閏六月二十四日奉上諭據蘇楞額等奏面問喇噶陳仍稱不敢改易本國禮節又夷船五隻俱已開行各一摺 覽奏益增憤恨 喇噶陳於乾隆五十八年隨同伊父入貢

今乃詭稱所行禮節全不記得且稱告知正使亦不敢改易本國禮節其海口所泊貢船並不先行告知徑自開行赴粵其奸詐欺罔之情可惡已極蘇楞額等並不預爲防範致使該夷船私自開行辦理亦太疎忽 甚屬怠玩 現在蘇楞額

等已帶領該貢使等由津北來沿途仍善爲開導本日派和世泰穆克登額二人前往通州等候蘇楞額等即同該貢使等於二十六七日趕抵通州朕面諭事宜和世泰等屆期傳知蘇楞額等一同遵辦此時蘇楞額等見該貢使斷乎不可將現又派員來通之處預行告知將此由四百里諭知蘇楞額並傳諭廣惠知之欽此遵旨寄信前來

嘉慶二十一年閏六月二十五廷寄清軍機處存檔

軍機大臣字寄欽差尙書蘇楞額長蘆鹽政廣惠嘉慶二十一年閏六月二十五日奉上諭蘇楞額等奏曉諭喚咭喇國貢使仍不肯遵照行禮一摺該貢使等屢經蘇楞額等曉諭仍不肯遵行三跪九叩之禮此時設尙在天津卽不准該貢使等來京朝覲就彼處遣令乘坐原船回國豈不甚便今原船業已開行蘇楞額等又已帶領該貢使等登舟北上行抵蔡村在彼停泊現在天氣暑熱舟中往來傳語諸多不便著卽於武清尋覓大公館一所將該貢使等安頓本日有旨諭令和世泰穆克登額迎赴武清蘇楞額等斷乎不可先向該貢使告知統俟和世泰等到彼再會同辦理可也將此諭知蘇楞額並傳諭廣惠知之欽此遵旨寄信前來

工部尙書蘇楞額奏報帶領喚咭喇國貢使趕赴通州摺

長蘆鹽政廣惠
清嘉慶二十一年閏六月
清軍機處存檔

奴才蘇楞額廣惠跪奏爲覆奏事閏六月二十五日接奉軍機大臣字寄內開

嘉慶二十一年閏六月二十四日奉上諭據蘇楞額等奏面問伺噹噹仍稱不
敢改易本國禮節又夷船五隻俱已開行各一摺覽奏益增憤悵伺噹噹於乾
隆五十八年隨同伊父入貢今乃詭稱所行禮節全不記得且稱告知正使亦
不敢改易本國禮節其海口所泊貢船並不先行告知徑自開行赴粵其奸詐
欺罔之情可惡已極蘇楞額等並不預爲防範致令該夷船私自開行辦理甚
屬怠玩現在蘇楞額等已帶領該貢使等由津北來沿途仍善爲開導本日派
和世泰穆克登額二人前往通州等候蘇楞額等即同該貢使等於二十六七
日趕抵通州朕面諭事宜和世泰等屆時傳知蘇楞額等一同遵辦此時蘇楞
額等見該貢使斷乎不可將現又派員來通之處預行告知將此由四百里諭
知蘇楞額並傳諭廣惠知之欽此奴才等接奉諭旨即刻帶領該貢使等開船
北上於二十六七日趕赴通州以便會同和世泰穆克登額遵旨辦理查該貢
使等海口停泊夷船理宜靜守等候回國今並不先行告知私自開行誠如聖
諭奸詐欺罔可惡已極奴才等未能預爲防範實屬怠玩不勝恐懼之至連日

奴才等開導窮詰貢使等行禮之處於二十四日已據情具奏現仍遵旨沿途再行善爲開導俾知順從以合禮節所有奴才等帶領該貢使等赴通緣由謹恭摺奏聞伏乞皇上睿鑒謹奏嘉慶二十一年閏六月二十六日

硃批另有旨欽此

嘉慶二十一年閏六月二十六日廷寄

軍機大臣字寄欽差尙書穆嘉慶二十一年閏六月二十六日奉上諭昨據蘇楞額等奏現將各船停泊武清縣蔡村地方是以降旨令蘇楞額等即將該貢使在武清安頓並令和世泰等迎赴武清本日復據蘇楞額等奏現又帶領該貢使等開船北上於二十六七日趕抵通州

看來蘇楞額廣惠心忙意亂毫無主意實屬債事於前張皇於後

該貢使既已北來和世泰等不必再行迎往即在通州公館等候遵照前奉諭旨向該貢使等善爲開導總以令其敬謹遵依帶同來京成禮而回最爲善策若始終不遵和世泰等即於七月初五六日具奏候朕降旨指示再行參奏辦理蘇楞額廣惠俱不必令其來京即在該處等候屆期另行降旨治伊二人之

罪將此諭令知之欽此遵旨寄信前來

工部尙書蘇楞額長蘆鹽政廣惠奏報安置噶哈喇國貢使住所摺

清嘉慶二十一年閏六月
將軍機處存

奴才蘇楞額廣惠跪奏爲奏聞事竊奴才等于閏六月二十五日接奉諭旨著帶領噶哈喇國貢使等于二十六日趕抵通州與和世泰等一同遵辦奴才等即刻由武清蔡村開船北上又於二十六日子刻接奉諭旨著於武清尋覓大公館一所將該貢使等安頓諭令和世泰等迎赴武清會同辦理等因奴才等開船北上距蔡村已及百里且和世泰等已迎赴前來奴才等恐該貢使等預知和世泰等到來即一面飭知原派出護送之天津道張五緯山永協副將寅賓妥協照料在後緩行奴才等一面暫爲先行於大湖口地方值和世泰等由水路迎赴前來奴才等於舟次相見恭請聖安因附近各處並無寬大房屋可以容作公館隨公同商定仍於通州安置該貢使等以便會同遵辦奴才等帶領該貢使等於二十七日戌刻行抵通州據倉場侍郎潤祥等奏准已覓妥

城內民房一所並城外原定下船處所岸邊空間木廠房間一所均收拾潔淨木廠房屋距下船處所較近其隨從人等及行李一切仍可安置原坐船隻即泊依住房門外便於照料奴才等隨將該貢使等安置木廠居住並嚴令通州派出兵弁巡羅稽查以昭慎重所有奴才等帶領該貢使等赴通居住木廠緣由謹恭摺奏聞伏乞皇上睿鑒謹奏嘉慶二十一年閏六月二十九日
硃批覽欽此

嘉慶二十一年閏六月二十八日廷寄

帶軍機處存檔

軍機大臣字寄兩江總督二等男百江蘇巡撫胡護理浙江巡撫額爾廣總督蔣廣東巡撫董傳諭粵海關監督祥紹嘉慶二十一年閏六月二十八日奉上諭本年暎咭喇國遣使入貢其貢船於本月初間行抵天津海口嗣貢使人等陸續登岸赴津其原貢船五隻併船內官役水手等五百八十餘人並未報明忽於二十日放洋東去

可惡已極

經蘇楞額廣惠詢問該貢使等據稱船隻先回

粵東等候回國未將緣故先行告知是伊等不是等語該國夷人居心狡詐雖

稱貢船駛往廣東恐於經過江南浙江洋面時又欲乘便在該二省海口收泊俱不可不防著百齡胡克家額特布預飭沿海口岸文武員弁如該貢船駛至欲行停泊即諭以該國貢使已奉大皇帝諭旨令由廣東回國該貢船應速往廣東等候此處不准停泊傳諭後即飭令開行不准一人上岸斷不可令其寄旋逗留並著蔣攸銛董教增詳紹不時差探一俟該貢船抵粵即派委委員將其船隻羈留先行具奏飭令安靜守候貢使等到粵仍乘原船歸國切勿疎懈又似在津時縱令私自開行以致辦理諸多窒礙也將此諭知百齡胡克家額特布蔣攸銛董教增並傳諭詳紹知之欽此遵旨寄信前來

直隸總督方受疇奏報接准粵撫札會咨查呵噉噹摺軍機處存檔

直隸總督臣方受疇跪奏為接准廣東撫臣董教增札會噉咭喇國入貢情形恭摺奏聞事竊查噉咭喇國貢使業已行抵天津蒙欽派蘇楞額前往與廣惠協同照料茲臣於閏六月二十七接准廣東撫臣董教增所寄前督臣那彥成來信內開前據噉咭喇國遣來遞稟之夷官稟稱該國貢船不由粵洋經過檢

查乾隆五十八年舊卷該夷貢船曾由粵省老萬山外洋駛過當飭巡洋舟師暨香山縣留心查探據報探得在粵貿易之暎咭喇國夷商呵嚙陳曾於五十八年隨同入貢前後在粵貿易數年粗諳漢語漢字該國王以該夷諳習禮節諭令充副貢使入都並據洋商代呵嚙陳遞具稟詞聲明出洋迎探貢船同行查各國夷商在粵貿易年久能諳漢語漢字者不止呵嚙陳一人第該夷現充副貢使進京既通中華語言文字難保無漢奸與之交結往來其經過口岸停泊處所札會飭屬設法稽查俾臻周妥等因到臣伏查呵嚙陳前既來過又在粵貿易數年能通漢語漢字如果現充副貢使隨同進京實難保無與漢奸結往來之事現據天津道府等稟夷使內有乾隆五十八年來過之人是否即係呵嚙陳自應查明嚴密防範除飛速咨明蘇楞額廣惠並行鎮道府等確查慎密辦理外所有接准札會咨行查辦緣由理合恭摺具奏伏乞皇上睿鑒謹奏嘉慶二十一年七月初一日

硃批知道了欽此

方受疇奏片

再臣先後接據天津鎮府等稟報啖咭喇國貢船五隻原泊天津海口旋已移動不知去向又據天津道稟稱聞得該船移泊天津祁口海面二隻其餘三隻停泊寧河縣海面是否屬實現飭該鎮道府并行通永道通州協寧河縣等一體查明該船實在下落督率文武人員小心防範照料並委員前往確查又粵省通事未到業經委員迎催又發傳牌於山東江南等境內迎探催令迅速來直至今未到並准山東江南督撫臣知會該通事尙未到境合併陳明謹奏嘉慶二十一年七月初一日

硃批另有旨欽此

嘉慶二十一年七月初一日廷寄 清軍機處存檔

軍機大臣字寄欽差尙書和世泰穆克登額蘇楞額傳諭長蘆鹽政廣惠嘉慶二十一年七月初一日奉上諭據方受疇奏探聞啖咭喇國貢船現移泊天津祁口海面二隻其餘三隻停泊寧河縣海面該貢使等前此原有另覓深水停

泊船隻之言此時既未遠駛著和世泰等即傳諭天津道張五緯以該道現無應辦事件立即馳赴祁口及寧河縣地方尋獲曠咭喇國貢船五隻會同天津鎮李東山飭令該夷官將貢船仍放回天津海口原泊處所俟貢船移至天津該鎮道不必申報總督轉奏即著李東山與張五緯聯銜迅速奏聞其貢船在天津停泊即責成李東山張五緯二人嚴密看守倘再縱令私自開行定將伊二人治罪不貸此時和世泰等自己向該貢使等反覆開導如該貢使已敬謹遵依當面濱行三跪九叩之禮無論何日一面奏聞一面即帶領進京若該貢使執意不從總以本月初六日爲斷據實奏聞候旨飭辦無庸頻將開導情形奏陳瀆聽也將此諭令知之欽此遵旨寄信前來

嘉慶二十一年七月初三日廷寄 清軍機處存檔

軍機大臣字寄欽差尚書和世泰穆克登額蘇楞額傳諭長蘆鹽政廣惠嘉慶二十一年七月初三日奉上諭和世泰等奏查探祁口及寧河縣海面均無夷船踪跡現派通水道葉紹本會同天津鎮李東山前往查尋該貢使等禮節尙

未演習如儀等語。噶喇國貢使和世泰等既派葉紹本等前往查探，俟查明據實覆奏。至該貢使等僻在荒夷，其於中國禮節原不能中規合度。此時總令該貢使等遵依行三跪九叩之禮，即起跪之間稍覺生疎，均無足深責。將來行禮時亦必派員帶領。東三省侍衛始克如儀。和世泰等當善爲開導，使其敬謹順從。凡事不可過於苛細，轉失駁外之禮，即五十八年亦係將就了此一事耳。總之逐回不如接見之爲是。察看情形可以成禮而還。卽一面奏聞，一面帶同該貢使等來京可也。將此諭知和世泰、穆克登額、蘇楞額，並傳諭廣惠知之。欽此。遵旨寄信前來。

和世泰等奏報派令葉紹本會同天津鎮查探夷船摺軍機處存檔

奴才和世泰、穆克登額、蘇楞額、廣惠跪奏爲遵旨覆奏仰祈聖鑒事。七月初一日接奉軍機大臣字寄，內開嘉慶二十一年七月初一日奉上諭：據方受疇奏探聞噶喇國貢船現移泊天津、祁口海面，二隻其餘三隻停泊寧河縣海面。該貢使等前此原有另覓深水停泊船隻之言，此時既未遠駛，著和世泰等卽傳諭天津道張五緯以該道現無應辦事件，卽馳赴祁口及寧河縣地方尋

獲嘆咭喇國貢船五隻會同天津鎮李東山飭令該夷官將貢船仍放回天津
海口原泊處所一俟貢船移至天津該鎮道不必申報總督轉奏即著李東山
張五緯聯銜迅速奏聞其貢船在天津停泊即責成李東山張五緯二人嚴密
看守倘再縱令私自開行定將伊二人治罪不貸此時和世泰等自己向該貢
使等反覆開導如該貢使已敬謹遵依當面演行三跪九叩之禮無論何日一
面奏聞一面即帶領進京若該貢使執意不從總以本月初六日爲斷據實奏
聞候旨飭辦無庸顯將開導等情形奏陳瀆聽也將此諭令知之欽此遵旨寄
信前來奴才等遵即飛咨天津鎮李東山迅速前往祁口及寧河縣地方察看
倘有夷船踪跡一面作速押令放回天津海口原泊處所一面即行遵旨會奏
奴才等案查閏六月二十三日奴才蘇楞額廣惠據天津縣程正堦來稟內稱
巡檢張寵稟稱聞夷船二隻移泊祁口地方三隻移泊寧河縣界隨即日照會
前任天津鎮詳啟劄飭天津府張大維作速即派委幹員並分往巡探如有夷
船停泊看守毋令挪移速速飛報等因去後閏六月二十六日據前任該鎮及

該府申報派大沽營都司郭義即赴寧河縣界海面查探派海口營守備劉國興即赴祁口地方海面查探據稱兩處海面四望並無見有停泊夷船踪影詢問該處捕漁各船據稱每日出海數十里均未見夷船住泊附近海洋並詢據巡檢張寵稟稱前係傳聞夷船有泊祁口寧河縣之說並無確據現未知夷船何往等語等因在案今奉諭旨著傳諭天津道張五緯立即馳赴祁口及寧河縣地方尋獲夷船惟查該道自帶領該貢使等進海口以來以及行抵通州沿途一切照料皆係跟隨行走該貢使等雖稍通中華言語其語音究有不同該道沿途照料與貢使等言語問答漸就熟悉連日奴才等傳問一切均係該道往來從事若令前往寧河等處誠恐另派員照料傳問語言不能明晰周到應請將該員留於通州以資熟手查有通水道葉紹本現在差次並無應辦要件奴才等公同商酌除即日飛咨天津鎮李東山遵辦外仍飭知該道立赴本屬寧河縣海面親身前往查探外並速赴祁口海面尋獲夷船作速會同天津鎮李東山辦理聯銜具奏無任遠颺以專責成再奴才等會同演習該貢使等禮

節尙未如儀奴才等現仍設法開導俟遵照行禮即行奏聞所有奴才等遵旨
移知天津鎮李東山派令通水道葉紹本前赴寧河等處查探夷船緣由恭摺
具奏伏乞皇上睿鑒謹奏嘉慶二十一年七月初三日
硃批另有旨欽此

嘉慶二十一年七月初四日廷寄 清軍機處存檔

嘉慶二十一年七月初四日內閣奉上諭昨派蘇楞額前往天津會同廣惠照
料映咭喇國貢使特令蘇楞額與軍機大臣一同進見諭以該貢使等到津後
傳旨賞給筵宴蘇楞額等帶領謝筵務令禮節演習嫻熟方可帶同來京若不
如儀卽據奏聞候旨飭辦所降諭旨甚爲詳明迨蘇楞額到津後又節次傳旨
令蘇楞額廣惠於筵宴該貢使時將其行禮謝筵情形詳悉奏聞再示以到園
日期如稍有異說先行據實具奏 候旨辦理 並兩次飭知令該貢使於成禮後仍
由天津登舟回國 早已料定此事必多牽纏詳細諭知 乃蘇楞額廣惠並不遵奉諭旨於筵宴
貢使之次日卽匆遽帶領起程又縱令該國貢船私自開行辦理實屬舛謬蘇

榜額廣惠俱著交部嚴加議處其啖咭喇國貢使等在海口停泊及到天津筵宴餼廩准其開銷自天津起程北來以及將來歸國沿途一應供支俱著罰令蘇榜額廣惠二人分賠以示懲戒欽此

和世泰等奏帶領啖咭喇國貢使演禮情形摺

軍機處存檔

奴才和世泰穆克登額蘇榜額廣惠跪奏爲奏聞事閏六月二十七日奴才等於通州將啖咭喇國貢使等安置木廠公館居住二十八日著隨帶司員章京等前往告知演禮以備帶領朝覲二十九日奴才等公同至通州考棚將該貢使等傳至明白曉示諭以天朝禮節該貢使等肅恭誠敬具見順從惟以遠國夷人於中華進退禮數未能合宜奴才等著令帶回公館連日派員開導一切俾能行禮如儀再行演習七月初三日接奉諭旨指示周詳奴才等跪讀之下仰見皇上聖明洞照天地包容體恤夷情無微不至欽遵聖訓撫馭得宜奴才等於初五日將該貢使等仍行傳至公所面爲詳細開導使其敬謹遵依該貢使等仰荷天恩至誠感服奴才等隨令其演習禮節起跪不甚自如勉力尙堪

成禮奴才等復凱切曉諭汝等奉國王之使入貢天朝起敬起畏恭順可嘉將來朝覲時大皇帝天恩高厚派員帶往行禮必不令汝等不克如儀該貢使等感稱海外遠夷得仰天顏不勝戰慄恐懼偷蒙恩派員帶領行禮得所遵循實爲感激惟有向化傾心敬承恩典奴才等謹遵諭旨將該貢使等演禮情形繕摺具奏於初六日帶領進京至圓明園蝸子湖公館恭候欽命謹此奏聞伏乞皇上睿鑒謹奏嘉慶二十一年七月初六日

硃批另有旨欽此

軍機處奏片

清嘉慶二十一年七月初五日
清軍機處存檔

本日詳啟到京臣等遵旨詢問據祥啟伏地碰頭口稱此次暎咭喇貢船係於閏六月初四日到天津海口攔江沙之外停泊十六日用內地船隻載運貢使及貢物登岸至天津城內我先於初五日起海口海神廟地方督率弁兵在岸巡邏該處距貢船停泊之處約有六十里十八日巡檢張寵乘船前往賞給該貢船人等牛羊鷄鴨等物我派把總李成德協同前往照料目見該貢船人等

俱各安靜該巡檢把總等於十九日趁潮進口至二十日辰刻我又派外委王希順乘船前往查看回來稟稱夷船五隻業已開放不知何往我當派把總李成德及該外委分頭察看杳無踪跡我實在無能不能先事預防以致該夷船私自開行辜負天恩悚愧無地等語謹奏七月初五日

天津鎮總兵李東山奏報探得啖咭喇國貢船已由山東放洋摺

軍機處存檔

天津鎮總兵奴才李東山跪奏為遵旨查探海口洋面並無住泊啖咭喇國船隻間據現來商船已於廟島眼見夷船經過日期恭摺奏聞仰祈聖鑒事竊奴才七月初一日抵海口接印任事立即飭派員弁出海查探一面恭摺叩諭天恩奏明在案奴才即於初一日親至海口砲臺遙望海洋形勢詢問該處熟悉海路兵民指稱海口迤外相隔攔江沙數十餘里潮水落時沙灘水淺是以出入船隻必須待長潮方能繞海路行走啖咭喇國貢船五隻原住泊攔江沙外洋面深水地方距海口路程有一百餘里自前月二十日該夷船開行去訖等語奴才即差員弁帶同所雇熟悉海路之民人乘漁船前往攔江沙外由原泊

夷船處所分赴海面查探初二日據派往千總陳平川探回稟稱千總由攔江沙外向東北查至寧河縣界外距大沽海口三百餘里遙望外洋並無停泊夷船踪影又據派往外委王希舜探回稟稱外委由攔江沙外順海道向東南查至祁口以東距大沽海口二百餘里已至深水洋面並無望見泊船踪跡各等語又據奴才派往放洋跟尋之都司郭義守備劉國興回來稟稱初一日都司等奉差雇用大海船放洋至草浦甸洋面一帶查探並無停泊夷船蹤跡初二日在洋面遇見福建裝貨商船一隻迎頭前來都司等幫上該船詢問係福建同安縣船戶金廣春裝載糖包赴天津發賣隨問該船曾否遇見暎咭喇國船一隻據該船管船人林乃珍同子林文德口稱閏六月二十四日在山東登州府屬廟島見有暎咭喇國小夷船一隻已向南開行二十七日晚間又見夷船二隻過去二十八日商船自廟島開行之時又見大夷船二隻由洋面向南去訖都司等隨同該商船至海口復加盤問據稱委係真實等情奴才即傳該商船林乃珍面加詢問據稱商船於六月二十五日自臺灣開行閏六月初八日住

泊廟島竇結二十八日開船放洋赴天津實係在廟島見有夷船五隻由洋面過去小的不敢妄稟等語伏查海口洋面奴才差弁查探並無停泊夷船蹤跡今福建商船林乃珍口稱在山東登州府屬廟島見有夷船五隻先後經過洋面日期理合據實奏聞伏乞皇上睿鑒謹奏嘉慶二十一年七月初五日

硃批欽此

嘉慶二十一年七月初五日 上諭 清軍機處存檔

嘉慶二十一年七月初五日奉 上諭 李東山奏探知暎咭喇夷船已由山東登州府屬之廟島洋面向南開行等語 暎咭喇夷船既於上月二十四及二十八等日駛過山東廟島洋面此時開行已遠毋庸再行追問現在南糧三進幫船計臨清放關後應已連檣北上著李東山即赴安陵一帶迅速催提務令晝夜儻行毋稍稽遲將此傳諭知之欽此

嘉慶二十一年七月初六日 上諭 清軍機處存檔

嘉慶二十一年七月初六日奉 上諭 本日有旨派盛泰護送暎咭喇貢使出境

該貢使於十二日由通州登舟著盛泰接奉此旨迅即赴通將水次事宜預爲料理以備該貢使即日開行該臬司送至山東交界與和舜武交替將沿途行走情形具奏卽行回省朕此次秋獮啟蹕盛泰毋庸隨扈將此傳諭知之欽此

嘉慶二十一年七月初六日上諭 清軍機處存檔

嘉慶二十一年七月初六日內閣奉上諭和世泰等奏曠咭喇國貢使連日演習禮儀極爲敬謹該國遠隔重洋輸誠慕化自乾隆五十八年入貢後今復遣使來庭納齋恭順可嘉本日和世泰穆克登額已帶領該使臣等來至海澱蠅子湖公館著於初七日在正大光明殿瞻覲初八日於正大光明殿筵宴頌賞禮成後仍帶至同樂園賜食初九日陛辭是日並賜遊萬壽山初十日和世泰等帶領該使臣入城十一日在太和門外頒賞後赴禮部筵宴十二日遣令回國卽派蘇楞額廣惠各戴原品頂戴沿途伴送欽此

嘉慶二十一年七月初六日上諭 清軍機處存檔

嘉慶二十一年七月初六日內閣奉上諭此次曠咭喇國遣使入貢其使臣瞻

觀宴賚事竣遣令回國著於通州乘船由運河行走經過山東江蘇浙江而上由安徽江西過大庾嶺至廣東惠門放洋已派蘇楞額廣惠沿途照料所有經過各省直接著派臬司盛泰山東著派藩司和舜武江蘇著派藩司陳桂生安徽著派臬司敦良江西著派臬司玉轅各於入境接護至出境交替並著該督撫於副參將內酌派一員帶領弁兵隨同派出之藩臬按程護送彈壓該貢使出境後該藩臬各將行走照料情形自行具奏一次廣東著派臬司明山並著蔣攸銛派委總兵一員帶領弁兵於交界處按護送至惠門該貢使登船後該督撫專摺奏聞欽此

嘉慶二十一年七月初六日上諭清軍機處存檔

嘉慶二十一年七月初六日內閣奉上諭前因噶哈喇國貢使船在天津海口私自開行南去降旨將祥啟革職昨祥啟到京經軍機大臣詢問具奏其過尙有可原特賞給二等侍衛前往新疆換班此次噶哈喇國貢使仍令由天津乘坐原船回國屢經諭知蘇楞額廣惠並未有旨傳諭祥啟本日召見祥啟據奏

伊接准蘇楞額等來札祇令防範夷船進口並禁止夷人登岸滋事其貢使等仍坐原船回國之處蘇楞額等亦未行知是該貢船私自放洋非祥啟意料所及朕於臣工功過賞罰一秉至公祥啟之過尙不至於斥革是以加恩錄用並非曲爲寬貸也欽此

嘉慶二十一年七月初七日上諭 清軍機處存檔

嘉慶二十一年七月初七日內閣奉上諭前因蘇楞額廣惠二人照料暎咭喇國貢使並不遵旨妥辦特降旨將伊二人交部嚴議另派和世泰穆克登額前往照料朕諭以該貢使在天津謝宴不能如儀和世泰等到通州後即向該貢使責問並令演習跪叩儀節和世泰等監看如式再行帶領來京如有不遵即將該貢使參奏候旨飭辦乃昨據和世泰等奏稱到通州後傳見該貢使諭以天朝禮節該貢使等肅恭誠敬令其演習禮節雖起跪不甚自如尙堪成禮現於初六日帶領進京至海澱蠅子湖公館是以降旨令於初七日帶領該貢使瞻觀昨日未刻和世泰等到園當經召見即據伊二人碰頭奏稱實未令該使

臣演禮

硃批不能

明日瞻觀必能成禮不致失儀

硃批既來演禮即應恭候旨

乃一味姑息將就了事徑自帶

來

本日卯刻貢使來至宮門朕已將次御殿該正使羅耳阿美士德猝然患病

不能行動

朕諭以正使患病先召副使進見又奏副使亦患病亦不能進見

該貢使等昨日不能早到及今

日不能成禮之處和世泰等又俱未預先陳奏

昨日召見又未面陳

其不遵諭旨辦理

舛錯與蘇楞額廣惠厥罪維均和世泰穆克登額俱著交部嚴加議處所有該

貢使等由通州至京及本日遣回由京至通州一應供支並著罰令和世泰穆

克登額分賠示懲欽此

硃批朕惟自責不能知人屢違諭旨以致外國使臣干犯名義成何事體不能

不執法矣

嘉慶二十一年七月初七日上諭清軍機處存檔

嘉慶二十一年七月初七日內閣奉上諭本日曠咭喇國貢使瞻觀之期正貢

使羅耳阿美士德已到宮門忽患重病不能行動

副使亦俱患病

竟係無福承受天

朝恩賚該貢使等著即日遣回該國王表文亦不必呈覽其貢物俱著發還所

有該貢使行程及沿途伴送彈壓之處仍遵照前旨行欽此

軍機處奏片

清嘉慶二十一年七月初七日
清軍機處存檔

臣等遵旨派軍機章京昌熾將臣等面奉諭旨傳知托津據托津稱喚咭喇使臣本係化外遠夷生性愚昧此次奉表進貢若於瞻覲一切儀節稍有未嫻我皇上懷柔遠人斷無不加體卹本日該使臣等已到宮門竟以患病不能行禮實係蠢愚無福不能仰承恩賚奉旨將該使臣等即日遣令回國表章貢物概行發還皇上權衡實爲至當不但喚咭喇使臣知所愧懼凡在外藩聞知亦必益加畏服至和世泰穆克登額未能遵旨妥辦交部嚴議實屬咎所應得不勝欽佩再據托津稱日內氣體尙覺軟弱遵旨於明日不進內數日內病體稍愈卽銷假當差等語謹奏嘉慶二十一年七月初七日

嘉慶二十一年七月初八日上諭 清軍機處存檔

嘉慶二十一年七月初八日奉硃諭此次喚咭喇國進貢使臣至天津海口登岸時命蘇楞額廣惠傳旨賜宴令其謝宴行三跪九叩禮如合式即日帶領進

京如不諳禮儀具奏候旨其原船勿令駕駛仍由原路回津泛海還國蘇楞額
廣惠故違旨意徑行帶來又縱令原船私去伊二人之咎在此因事已不妥又
命和世泰穆克登額迎赴通州演禮以七月初六日爲限限內行禮即日帶來
滿限尙未知儀即行參奏候旨和世泰穆克登額於初五日含混具奏初六日
徑自帶來除於未初二刻御勤政殿召見伊二人先詢以演禮之事伊二人免
冠碰頭云併未演禮及至再問以旣未演禮何不參奏和世泰云明早進見必
能如儀此一節伊二人之咎已同前二人矣至初七日早膳後卯正二刻朕傳
旨陞殿召見來使和世泰初次奏稱不能快走俟至門時再請二次奏稱正使
病泄少緩片刻三次奏稱正使病倒不能進見即諭以正使回寓賞醫調治令
副使進見四次奏稱副使俱病俟正使痊愈後一同進見中國爲天下共主豈
有如此侮慢倨傲甘心忍受之理是以降旨逐其使臣回國不治重罪仍命廣
惠護送至廣東下船近日召見廷臣始知來使由通州直至朝房行走一夜來
使云進見朝服在後尙未趕到便服焉能瞻謁大皇帝此等情節和世泰見面

時何不陳奏即或遺忘或晚間補奏或次日一早具奏俱可直至將次陞殿總未奏明情節伊二人之罪重於蘇楞額矣若預先奏明必改期召見成禮而返不料庸臣誤事至此朕實無顏下對臣工惟躬自引咎耳四人之罪俟部議上時再行處分先將此旨通諭中外及蒙古王公等知之欽此

勅諭 清軍機處存檔

奉天承運皇帝勅諭 朕聞喇國王知悉爾國遠在重洋輸誠慕化前於乾隆五十八年先朝高宗純皇帝御極時曾遣使航海來庭維時爾國使臣恪恭成禮不愆於儀用能仰承恩寵瞻覲筵宴錫賚便蕃本年爾國王復遣使齎奉表章備進方物朕念爾國王篤於恭順深爲愉悅循考舊典爰飭百司俟爾使臣至日瞻覲宴賚悉仿先朝之禮舉行爾使臣始達天津朕飭派官吏在彼賜宴詎爾使臣於謝宴時即不遵禮節朕以遠國小臣未嫻儀度可從矜恕特命大臣於爾使臣將次抵京之時告以乾隆五十八年爾使臣行禮悉跪叩如儀此次豈容改異爾使臣面告我大臣以臨期遵行跪叩不致愆儀我大臣據以入奏

朕乃降旨於七月初七日令爾使臣瞻覲初八日於正大光明殿賜宴頒賞再於同樂園賜食初九日陞辭並於是日賜遊萬壽山十一日在太和門頒賞再赴禮部筵宴十二日遣行其行禮日期儀節我大臣俱已告知爾使臣矣初七日瞻覲之期爾使臣已至宮門朕將御殿爾正使忽稱急病不能動履朕以正使猝病事或有之因祇令副使入見乃副使二人亦同稱患病其爲無禮莫此之甚朕不加深責即日遣令歸國爾使臣既未瞻覲則爾國王表文亦不便進呈仍由爾使臣賚回但念爾國王數萬里外奉表納饗爾使臣不能敬恭將事代達憫忱乃爾使臣之咎爾國王恭順之心朕實鑒之特將貢物內地理圖畫像山水人像收納嘉爾誠心卽同全收並賜爾國王白玉如意一柄翡翠玉朝珠一盤大荷包一對小荷包八個以示懷柔至爾國距中華過遠遣使遠涉良非易事且來使於中國禮儀不能諳習重勞唇舌非所樂聞天朝不寶遠物凡爾國奇巧之器亦不視爲珍異爾國王其輯和爾人民慎固爾疆土無間遠邇朕實嘉之嗣後毋庸遣使遠來徒煩跋涉但能傾心效順不必歲時來朝始稱

向化也俾爾永遵故茲勅諭

清嘉慶二十一年七月初八日廷寄滑軍機處存檔

軍機大臣字寄原品頂戴尙書蘇嘉慶二十一年七月初八日奉上諭此次曠
哈喇國貢使在天津謝宴不行跪叩禮至通州又不肯遵奉演禮初七日瞻覲
之期該貢使已到宮門正副貢使三人俱稱患病以致不能成禮是以卽日遣
令出京但該國王於重洋萬里之外遣使進表納貢其輸誠慕化之意實可嘉
許今以使臣失禮將其國王貢物全行卻退又不加以賞賚朕心未免歉然著
蘇楞額將此意明白曉諭該使臣將該國王原貢單內所開地理圖四張該國
王王妃畫像二張銅板印的英國山水人像畫九十五張加恩賞收以達該國
王誠意倘該使臣因此復將他貢件仍乞賞收蘇楞額總以遵旨不敢多收一
件嚴詞拒絕茲特派乾清門侍衛布彥泰賚去白玉如意一枝翡翠玉朝珠一
盤大荷包一對小荷包八個賞給該國王蘇楞額即傳旨交該使臣領賚回國
現在各該省俱有派出藩臬沿途照料廣惠一人已足伴送行走蘇楞額在京

差使尙多著於傳旨後即覽所收圖畫來京覆命
遞摺 請安 毋庸前赴廣東矣將
此諭令知之欽此遵旨寄信前來

清嘉慶二十一年七月初八日廷寄 清軍機處存檔

軍機大臣字寄直隸山東江蘇浙江福建廣東各督撫嘉慶二十一年七月初八日奉上諭此次曠咭喇國遣使入貢該使臣等到天津時朕特派蘇楞額廣惠前往賞給筵宴蘇楞額帶領該貢使謝宴該貢使即不遵行三跪九叩之禮比至通州又派和世泰穆克登額前往責問並令演習跪叩儀節據和世泰等奏稱該使臣等起跪尙堪成禮於初六日帶至海澱公館當經降旨令於初七日帶領瞻覲屆期該貢使等已到宮門正貢使忽患重病不能行動朕諭以正使患病即召副使進見其副使復稱患病不能進見該貢使等如此狡詐無禮不能仰承恩賚是以降旨將該貢使等即日遣回派令廣惠沿途伴送由直隸山東江南安徽江西廣東水陸程途遞送至粵門登舟回國其貢船五隻前由天津私自開行南去即經諭知江南浙江廣東各督撫如該貢船駛至海口即

飭令開行不准一人上岸不許寄碇逗留並令蔣攸銛祥紹侯該貢船抵粵即將其羈留飭令守候貢使等到粵仍乘原船歸國本日據陳預奏稱閏六月二十二日早間曉咕喇貢船一隻到登州剛兒嘴寄碇未刻開至廟島外洋暫泊等候後船四隻於二十五日開行由榮城成山一帶駛赴江南交界洋面等語曉咕喇夷船已由山東放洋南去不日駛至廣東該督撫等自各遵照前旨辦理該貢使等此次不能成禮致令駁遣回國倘夷性罔知法度潛於沿邊海口窺伺著直隸山東江蘇浙江福建廣東各督撫飭知沿海文武員弁各將水師砲械勤加訓練並留心察探此後如有曉咕喇國夷船駛近海口即行驅逐不許寄碇停泊亦不准其一人登岸倘該夷船不遵約束竟有搶掠情事即痛加勦殺或用礮轟擊不可稍存姑息將此各諭令知之欽此遵旨寄信前來

清嘉慶二十一年七月初八日廷寄 清軍機處存檔

軍機大臣字寄兩廣總督蔣嘉慶二十一年七月初八日奉上諭此次曉咕喇貢使到京於瞻覲時正副使臣俱患病不能行禮業已降旨即日遣回令廣惠

伴送赴粵前有旨令蔣攸銛等將該貢使原船羈留計彼時該國原貢船如已早抵粵門該使臣等到粵後蔣攸銛仍遵照前旨令臬司明山同派出之總兵沿途照料彈壓令其安靜下船所有頒給該國王勅諭一道隨後由驛發往該督接收暫存俟該使臣等到日即交令恭賚回國至該副使呵噹噹久住粵門通曉內地語言人本譎詐此次該使臣等反覆狡猾料必係伊從中播弄呵噹噹到粵時即飭令同該正使等一併回國勿許停留伊若請於回國後仍來粵門充當大班亦嚴詞飭禁斷不許其再來並諭知各洋行勿許私自容留違者治罪再粵海關徵收稅課舊通貿易各國每年共約收稅銀若干兩噶咭喇一國每年計約收稅銀若干兩如將噶咭喇國停止貿易是否可行著該督詳細查明酌議具奏候旨飭遵將此諭令知之欽此遵旨寄信前來

曹寅子連生奏曹寅故後情形摺 清康熙五十一年九月初四日

曹寅子奴才連生謹奏爲感沐皇仁矜全身命恭謝天恩事竊奴才祖孫父子世受國恩涓埃未報奴才故父一生叨沐聖主浩蕩洪恩出管江寧織造二十餘年復四差鹽務遭逢異數疊加無已方圖矢誠報効上答高厚不意壽命不延遽辭聖世奴才年當弱冠正犬馬効力之秋又蒙皇恩憐念先臣止生奴才一人俾擄任所教養豈意父子聚首之餘即有死生永別之慘乃得送終視殮者皆出聖主之賜也奴才父病亟時自知疾篤故面託李煦代奏求賜聖藥李煦摺回傳示御批仰荷皇上天高地厚之恩從古未有不料先期世逝辜負聖心九泉之下飲泣何窮至父病臨危頻以天恩未報垂淚諄諭命奴才盡心報國又以所該代商完欠及織造錢糧槌胸抱恨口授遺摺上達天聽氣絕經時日猶未瞑奴才傷心慟哭不知所措九月初三日奴才堂兄曹順來南奉梁總管傳宣聖旨特命李煦代管鹽差一年著奴才看著將該欠錢糧補完倘有甚麼不公復命奴才摺奏欽此欽遵跪聆之下奴才母子不勝惶悚恐懼感激痛

哭擗頰流血謹設香案望闕叩頭謝恩竊思奴才伶丁孤苦舉目無親貧彌天之罪戾萬死何辭乃蒙皇上格外洪慈不即伏斧鑕重沛恩綸昊天罔極一至於此不特故父名節得荷矜全奴才身家性命實蒙恩賜卽粉骨碎身肝腦塗地莫能仰報萬一惟有率領全家長幼朝夕焚香頂祝生生世世圖効犬馬啣結無窮奴才包衣下賤自問何人敢擅具摺奏緣奉聖旨格外洪恩螻蟻感激之私無由上達謹冒死繕摺恭謝天恩伏乞睿鑒奴才不勝泣血頂戴激切屏營之至康熙五十一年九月初四日

硃批知道了

江寧織造主事曹顯奏謝繼任江南織造摺

清康熙五十二年正月初三日

江寧織造主事奴才曹顯謹奏恭請萬歲聖安竊奴才包衣下賤年幼無知荷蒙萬歲曠典殊恩特命管理江寧織造繼承父職又蒙天恩加授主事職銜復奉特旨改換奴才曹顯學名隆恩異數疊加無已亘古未有奴才自問何人輒敢仰邀聖主洪恩一至於此今奴才於二月初二日已抵江寧蒞任恭設香案

望闕叩頭謝恩接印視事訖竊念奴才祖孫父子世沐萬歲浩蕩之恩身家性命皆出聖主之所賜雖捐糜頂踵粉骨碎身莫能仰報高厚於萬一惟有凜遵聖訓矢公矢慎冰兢自持竭誠報効以仰副萬歲矜全之至意謹繕摺恭謝天恩伏乞聖鑒奴才不勝激切感戴之至康熙五十二年正月初三日

硃批朕安

江寧織造主事曹顯奏李煦代任鹽差補完虧欠情形摺附單一件

清康熙五十二年十一月十三日

江寧織造主事奴才曹顯謹奏爲恭謝天恩事竊奴才父寅去年身故荷蒙萬歲天高地厚洪恩憐念奴才母子孤寡無倚錢糧虧欠未完特命李煦代任兩淮鹽差一年將所得餘銀爲奴才清完所欠錢糧皇仁浩蕩亘古未有今李煦代任鹽差已滿計所得餘銀共五十八萬六千兩零所有織造各項錢糧及代商完欠李煦與奴才眼同俱已解補清完共五十四萬九千六百餘兩謹將完過數目恭呈御覽尙餘銀三萬六千餘兩奴才謹收貯竊念奴才祖孫父子世

沐主恩涓埃莫報自奴才父故後奴才母子孤苦伶仃子然無倚且又錢糧虧欠紛身莫贖乃蒙萬歲破格天恩俾錢糧得以清補全完不特奴才母子身家性命得荷矜全奴才故父九泉之下亦得瞑目如此昊天罔極之恩雖肝腦塗地亦難報高厚於萬一奴才母子相依感激痛哭惟有朝夕焚香頂祝萬壽無疆奴才隨後即起身赴闕恭謝天恩謹先具摺奏聞伏乞聖鑒奴才不勝感激頂戴之至康熙五十二年十一月十三日
硃批知道了

附單 清康熙五十二年十一月十三日

李煦代任鹽差一年淨得餘銀五十八萬六千兩零內一解江蘇織造銀二十一萬兩一解江寧年例神帛銀一千九百二十兩一解江寧備製神帛銀三千兩一解江寧備製誥命銀五千兩一解江寧養匠銀二千七百兩一解江蘇織造買辦銀二千兩一解江蘇織造自備船隻水脚銀二千兩一解江蘇織造修理機房銀一千兩一代商完欠歸運庫銀二十三萬兩一補九寧織造虧欠銀

九萬二千兩零以上解補過銀共五十四萬九千六百二十兩零尙餘銀三萬六千四百兩零

江寧織造主事曹顯奏請進鹽差餘銀摺

清康熙五十二年十二月二十五日

江寧織造主事奴才曹顯謹奏竊奴才父寅故後奴才母子孤苦伶仃身家性命已同瓦解仰荷萬歲如此天恩得以保全今錢糧俱已清補全完奴才一家自頂至踵皆蒙聖主再生之德又屢蒙聖訓不敢絲毫浪行花費奴才仰賴天恩可以過活所有鹽差任內餘剩銀三萬六千兩奴才無有費用之處奴才臨行之時母諭諄諄以奴才年幼並無一日効力犬馬乃沐萬歲天高地厚洪恩一至於斯殺身難報將此所得餘銀恭進主子添備養馬之需或備賞人之用少申奴才母子蟻蟻微忱伏乞天恩賞收不特奴才母子感沐恩榮奴才父寅九泉之下亦得瞑目奴才曷勝恐懼感戴激切叩頭之至康熙五十二年十二月二十五日

硃批當日曹寅在日惟恐虧空銀兩不能完近身沒之後得以清了此母子一

家之幸餘剩之銀爾當留心况織造費用不少家中私債想是還有朕只要六千兩養馬

江南織造主事曹頌繼任江寧織造謝恩摺

清康熙五十四年三月初七日

江寧織造主事奴才曹頌謹奏爲恭謝天恩事竊奴才於二月初九日奏辭南下於二月二十八日抵江寧省署省親老母傳宣聖旨全家老幼無不感激涕零叩頭恭祝萬壽無疆奴才謹於本月初六日上任接印視事敬設香案望闕叩頭恭謝天恩竊念奴才包衣下賤黃口無知伏蒙萬歲天高地厚洪恩特命奴才承襲父兄職銜管理江寧織造奴才自問何人驟蒙聖主浩蕩洪恩一至於此奴才惟有矢公矢慎遵守成規盡心辦事上以圖報主恩下以奉養老母仰副萬歲垂憫孤孀矜全骨肉之至意謹具摺奏聞伏乞聖鑒奴才不勝感激惶悚之至康熙五十四年三月初七日

硃批知道了

江寧織造主事曹頌代母陳情摺 清康熙五十四年三月初七日

江寧織造主事奴才曹穎謹奏爲皇仁浩蕩代母陳情恭謝天恩事竊奴才母在江寧伏蒙萬歲天高地厚洪恩將奴才承嗣襲職保全家口奴才母李氏聞命之下感激痛哭率領闔家老幼望闕叩頭隨於二月十六日赴京恭謝天恩行至滁州地方伏聞萬歲諭旨不必來京奴才母謹遵旨仍回江寧奴才之嫂馬氏因現懷妊孕已及七月恐長途勞頓未得北上奔喪將來倘幸而生男則奴才之兄嗣有在矣本月初二日奴才母舅李煦前來傳宣聖旨奴才母跪聆之下不勝感泣搏頰流血謹設香案望北叩頭謝恩竊念奴才祖孫父子世沐聖主豢養洪恩涓埃未報不幸父兄相繼去世又蒙萬歲曠典奇恩亘古未有奴才母子雖粉身碎骨莫能仰報高厚於萬一也謹具摺代母奏聞恭謝天恩伏乞聖鑒奴才母子不勝激切感戴之至康熙五十四年三月初七日
硃批知道了

江寧織造
主事曹穎

奏捐銀兩以供軍需摺

清康熙五十四年
九月初一日

江寧織造主事奴才曹穎跪奏爲皇恩浩蕩効力無從情願捐貲少供軍需事

竊惟萬歲聖文神武四海一家雖昆蟲草木無不仰沾聖化不意澤旺阿喇蒲坦藐弱殘生荷沐萬歲覆載洪恩不思報德輒敢逆天兵所指如風偃草正其自取殄亡之日竊念奴才祖孫父子世沐主恩至深極重自奴才父兄去世以來又蒙萬歲天高地厚洪恩矜全孤寡保存身命種種受恩之處迥異尋常今日奴才母子所有身家自頂至踵皆蒙萬歲再造之賜雖粉骨碎身難報萬一奴才接閱邸抄知部議需用駱駝運送軍糧老母泣諭奴才以爲奴才等仰沐主恩參養足以過活惟恨不能身親荷擔爲國驅馳情願捐銀三千兩少供採買駱駝之用略申螻蟻微誠謹具摺奏聞伏乞天恩賞收奴才母子不勝激切頂戴之至康熙五十四年九月初一日

硃批交部了

江寧織造主事曹頌奏報總督赫壽丁憂百姓環請保留情形摺

清康熙五十四年十一月初一日

江寧織造主事奴才曹頌跪奏江南總督臣赫壽之母今年八十有一於十月二十五日在暑病故闔城百姓恐其丁憂離任俱罷市不令總督交印環請保

留將軍等慰諭再三方始開市所有地方情形理合具摺奏聞伏乞聖鑒康熙五十四年十一月初一日

硃批知道了

江寧織造主事曹頌奏進晴雨錄摺

江寧織造主事奴才曹頌謹奏恭請萬歲聖安謹將五十四年正月二月分晴雨錄恭呈御覽伏乞聖鑒

硃批知道了

江寧織造主事曹頌覆奏家務家產摺清康熙五十四年七月十六日

江寧織造主事才奴曹頌跪奏恭請萬歲聖安七月十四日奴才家奴賈捧摺子回南蒙御批你家中大小事爲何不奏聞欽此奴才跪讀之下不勝惶悚恐懼感激涕零竊奴才自幼蒙故父曹寅帶在江南撫養長大今復荷蒙天高地厚洪恩俾令承嗣父職奴才到任以來亦曾細爲查檢所有遺存產業惟京中住房二所外城鮮魚口空房一所通州典地六百畝張家灣當舖一所本銀七

千兩江南含山縣田二百餘畝蕪湖縣田一百餘畝揚州舊房一所此外並無買賣積蓄奴才問母親及家下管事人等皆云奴才父親在日費用很多不能顧家此田產數目奴才哥哥曹顯曾在主子跟前面奏過的幸蒙萬歲天恩賞了曹顯二萬銀子纔將私債還完了等語奴才到任後理宜即爲奏聞因事屬猥屑不敢輕率今蒙天恩垂及謹據實啟奏奴才若少有欺隱難逃萬歲聖鑒倘一經察出奴才雖粉身碎骨不足以蔽辜矣奴才不勝惶恐感戴之至康熙五十四年七月十六日

硃批知道了

江寧織造主事曹纘奏二次種稻不實緣由摺

清康熙五十四年十二月初一日

江寧織造主事奴才曹纘跪奏恭請萬歲聖安江南太平無事米價照常每石六錢至七錢三四分不等百姓安生樂業鼓腹豐年再江寧二次所種之稻雖亦發秀但不能成實奴才愚昧莫測其由不勝惶恐今接奴才母舅李煦來字傳示批旨凡所種至立秋後未必成實四月初十種遲了京裏的六月二十已

得進矣欽此奴才跪讀之下始悟二次不實之由乃因種遲之故仰見萬歲聖明無物不格眞亘古所未有也謹將種遲不實緣由并十一月分晴雨錄理合具摺奏聞伏乞聖鑒康熙五十四年十二月初一日

硃批知道了

江寧織造主事曹頓奏御賜普濟寺匾額代民謝恩摺

清康熙五十五年六月十三日

江寧織造主事奴才曹頓跪奏奴才自五月十七日到江南料理織造衙門事竟謹於五月二十五日恭齋欽賜普濟寺御書匾額到蘇會同李煦擇於六月初三日在普濟寺第三層大殿敬上匾額御書墨筆珍藏本寺永爲傳世之寶闔郡紳衿士庶聞之皆懽欣鼓舞頂香迎接咸云我萬歲萬幾霄旰無刻不以民生爲念令建立普濟寺不過我等士庶創舉小善乃蒙萬歲不惜宸翰欽頒匾額仰見聖主惠愛元老安少懷之至意我等益當感勸仰副天心於本寺內建醮演戲慶祝萬壽無疆又合詞具呈求請代奏恭謝天恩奴才於本月十二日回至江寧所有地方士民感激情形理合具摺奏聞伏乞聖鑒康熙五十

五年六月十三日

硃批知道了

附硃諭

原附於五十九年二月初二日報雨水摺內

近來你家差事甚多如磁器法琅之類先還有旨意件數到京之後送至御前覽完纔燒法琅今不知騙了多少磁器朕總不知已後非上傳旨意爾卽當密摺內聲名奏聞倘瞞著不奏後來事發恐爾當不起一體得罪悔之莫及矣卽有別樣差使亦是如此

江寧織造
主事曹頌

奏遵旨照看熊賜履之子情形摺

清康熙五十五年二月初六

江寧織造主事奴才曹頌跪奏恭請萬歲聖安李煦至江寧傳宣聖旨著奴才照看前大學士臣熊賜履之子欽此欽遵奴才隨親往其家看視其長子熊志伊風痰時發次子志契年九歲幼子志夔年八歲現在攻書俱閉門不交外事家中粗可過活奴才先送與銀二百兩爲其家盤費之資理合具摺奏聞伏乞聖鑒康熙五十五年二月初六日硃批知道了

三千八百十四兩零又除撥補關稅缺額銀五千四十兩外尙剩羨餘銀六千二百七十兩零臣已將六千兩交明藩庫留充公用餘銀二百七十兩留爲犒賞之用合將本年撥補缺額銀兩數目以及充公銀兩數目謹據實奏聞爲此謹奏雍正五年十二月十八日

硃批知道了

廣東巡撫楊文乾奏報太平關稅盈餘數目摺 清雍正四年七月

臣楊文乾謹奏爲奏聞事竊照粵東太平一關從前因盤查過嚴客商多由別路行走以致課銀漸少臣抵任以後查知其弊即出示輕減商賈樂趨課額或可少增已經奏明在案今扣至本年七月二十日已滿一年除正項外計共得盈餘銀四萬五千七百二十四兩查上年盈餘銀三萬八千六百三十兩今年多增銀七千一百二十餘兩現在另行具疏題報並委員將銀兩解部合先繕摺奏聞伏乞皇上睿鑒雍正肆年七月二十六日

硃批知道了

廣東巡撫楊文乾奏解銀兩並查出海關陋規數目摺

清雍正五年閏三月初一日

臣楊文乾謹奏爲奏聞事竊照廣東粵海關稅務於正月二十三日已滿計去年洋船僅到七隻除正額銀四萬三千七百五十兩俱發布政司收庫羨餘銀四萬八千零委員解送內部交納已經起身外查粵海關陋弊甚多臣先將書役藉稱繳官公費需索商民陋規銀一萬餘兩情由查出革除奏明在案此外尙有分頭擔頭樑頭等項係管關衙門陋規相沿已久臣思若一併革除徒於洋商有益與小民無涉况洋商獲利甚厚亦不必令其再加便宜但臣受恩深重絲毫不敢自私總計各項陋規共得銀三萬八千一百有零臣本擬差官至別省穀賤處所採買穀石以廣倉儲近聞各省穀價頗不甚賤採買亦覺艱難容臣經過江西湖廣地方時親加探聽確實或仍買穀貯廣或將銀兩解部以充公羨俟臣陛見時面奏請旨今因海關羨餘銀兩解部合將所得各項陋規數目一併奏聞伏乞皇上睿鑒雍正五年閏三月初一日

硃批到京面奏

廣東巡撫楊文乾奏報前撫常賚阿克敦任內關稅餘銀細數摺

清雍正六年六月初一日

臣楊文乾謹奏爲據實奏明事竊照粵海一關臣于雍正四年分經徵稅餉除正額羨餘之外另有分頭擔頭樑頭各雜項總計管關衙門規禮共得銀三萬八千一百餘兩已於去年春間具摺奏明在案今值起解雍正五年分羨餘銀兩之期臣現在將前項分頭等銀附解內庫外所有雍正五年分收過正羨等銀臣於回任之後將管關書吏所存底冊細加核算署撫臣常賚任內共收正雜銀六萬一千四十四兩二錢零除發司庫收貯正額羨餘並存關庫考核部費水腳等項外應餘銀二萬四千七百九十九兩零又除那補太平關缺額銀八千四百八十八兩零淨餘銀一萬六千三百一十一兩零未經移交又署撫臣阿克敦任內共收正雜銀五萬三千七百四十七兩六錢除發司庫收貯正額羨餘並存關庫考核部費水腳等項外應餘銀一萬六千一百八十二兩零又除那補太平關缺額銀二千四百七十六兩零淨餘銀一萬三千七百六兩

零亦未移交臣查此二項共銀三萬餘兩常賚阿克敦並未移交臣查問管關書吏云他各人俱已帶去但不知常賚阿克敦會否奏明無從稽查硃批行咨問二人明白臣今現在接管關務所有算明前任餘銀細數理合一併奏聞伏乞皇上睿鑒雍正六年二月初一日

硃批覽

廣東巡撫楊文乾覆奏咨問常賚阿克敦關稅餘銀情形摺

清雍正六年七月初一日

臣楊文乾謹奏為覆奏事竊照臣前奏署撫臣常賚阿克敦將粵海關銀兩帶去一摺奉硃批行咨問二人明白回奏欽此臣隨行咨詢問去後今准常賚咨稱隨查粵海關稅本院署任內所收正羨擔銀規禮銀兩俱照從前規例於各口解銀到日先將正銀發司次發羨餘併留存考核諸費銀兩貯庫其外擔頭等項查照歷來規例各照分給司事尚有餘剩本院於署任內日逐費用併為赴閩盤費訖等因其阿克敦處日前未經給有回咨臣復差人往催始准咨稱關稅尚餘銀九千一百二十三兩零公事共用過銀四千二百一十五兩零似

可開除尙餘銀四千九百七兩零俱應認賠等因各到臣准此所有咨問過常
賚阿克敦緣由謹繕摺遵旨明白回奏並將原奉硃批恭繳伏乞皇上睿鑒雍
正六年七月初一日

附不全摺一件

按清故事凡有參奏之摺發下被參人閱看時輒裁去原奏人銜名故
此摺前半闕

聖恩實爲天地之所不容矣謹詳細陳之查粵海關稅定額四萬有零雍正四
年據楊文乾報稱連溢羨九萬餘兩臣細加查訪因經手書辦俱令回籍其細
數未得盡知總數實有十五萬零尋人帶來銀內每兩抽銀三分九厘爲之分
頭計得銀二萬餘兩此係粵海關舊例再紅黃顏色綢緞例禁出洋楊文乾令
其置買每緞一疋得銀七錢線綢五錢綢疋及線每觔得銀四錢約計得銀萬
兩又洋船所載多半皆屬番銀于起船時勿論其是否置貨先以每兩加一抽
分得銀四萬三千兩此係楊文乾例外之求復以進上物件洋船開艙時檢選

奇巧統歸署內並不發價專行代償約置銀二萬餘兩又將銀一萬九千兩作銀二萬交鹽商沈弘甫生利每年取利七千二百兩再查專行數家內有或爲推病者有或爲遠邊者蓋因楊文乾進京時傳各行吩咐今年計要八月回粵尋人帶來銀兩不能細查總以洋船所置貨物湖絲一擔扣銀二十兩茶葉扣銀五兩磁器等貨扣銀二兩按摺計銀回時彙解此楊文乾之見小處也至人言湖廣武昌之漢口山東之東昌各有生業雖傳聞不啻一口但未確訪得實不敢妄奏謹此奏聞伏惟睿鑒謹奏

兩廣總督孔毓珣奏報關稅盈餘數目摺

清雍正四年二月

兩廣總督臣孔毓珣謹奏爲奏報關稅銀兩事竊臣於上年署理廣東巡撫帶管太平粵海兩關稅務初次自五月二十一起至七月二十日止太平關盈餘銀八千六百三十兩粵海關盈餘銀一萬五千二百兩業經臣奏報在案第二次署事按關稅報滿季分太平關自七月二十一起至十一月初一送印前一日止收過正稅一萬四千七百六十兩零盈餘銀二萬一千二百二十四

兩又粵海自七月二十四日起至十一月初一送印前一日止收過正稅一萬一千七百八十八兩零盈餘銀三萬四千七百一十一兩零二關共收正稅銀二萬六千五百四十九兩零共盈餘銀五萬五千九百三十五兩零內臣署任內解到即發藩司貯庫彙解銀四萬二千二百二十七兩零臣交印後解到經撫臣楊文乾收貯銀一萬三千七百八十兩零皆賴皇上恩德普照是以商賈絡繹今遠處各口臣經差查明白理合奏報謹奏雍正四年二月拾二日
硃批知道了

兩廣總督孔毓珣奏前任移交關稅數目摺

清雍正六年九月

兩廣總督臣孔毓珣謹奏爲奏明前任撫臣移交關稅數目事竊臣於雍正六年七月初七日署理巡撫印務准前撫臣楊文乾將太平關三橋廠稅自雍正五年六月二十一日起至雍正六年六月二十日止前署撫臣常賚阿克敦石禮哈並撫臣楊文乾各任內徵收正稅共銀五萬二千六百七十五兩一錢七分零內除支該關一年經制各役工食一百八十六兩外尙正銀五萬二千四

百八十九兩一錢七分零并贏餘銀三萬五千四百一十九兩一錢二分零册
檔藩庫實收移交到臣查該關已於雍正六年六月二十日一年期滿册檔亦
經核明臣即代爲題報其應解贏餘銀兩行據布政司王驀詳稱上年惠潮道
樓儼兩次借支運穀水脚四千兩至今未還經臣續行題明將現存司庫贏餘
銀三萬一千四百一十九兩零於本年八月二十一日先行起解其樓儼借支
銀四千兩俟追還於下次搭解在案臣查一年期內止有正羨稅銀並無火耗
等項因令吏書清查數目今於九月初九日據前撫臣楊文乾之子楊應琚交
出自雍正六年正月十一日起至七月初四日止耗銀等項共銀八千七十二
兩零當發布政司兌收貯庫行明於下次贏餘銀內一并搭解其自雍正五年
六月二十一日起至雍正六年正月初十日止所收耗銀等項詢據該書稟稱
自雍正五年六月二十一日起至七月十八日止常署院共收過耗銀八百五
十四兩四錢一分自雍正五年七月十九日起至十月三十日止阿署院共收
過耗銀四千一百四十九兩七錢零七厘自雍正五年十一月初一日起至雍

正六年正月初十日止石署院共收過耗銀三千四百五十七兩七錢二分八厘查阿克敦現今在粵常費亦將次到廣可以就近查詢將軍臣石禮哈業已赴京臣除另咨石禮哈令其自行奏明請旨俾錢糧各有著落至粵海關准前撫臣揚文乾移交任內經徵並署撫臣石禮哈任內及續經收起共正銀二萬三千一十三兩零羨餘銀九千六百三十兩零已飭管關之廣州府知府張錯傾銷發司貯庫尙有未經解到收起銀共二千零現在催解外所有前撫臣楊文乾之子楊應琚續交出太平關耗銀等項並粵海關已收稅銀正羨擔規數目合行奏聞謹奏雍正六年九月十一日

硃批此事汝等審明奏到時有旨

兩廣總督孔毓珣奏經收關稅數目摺

清雍正六年十一月

兩廣總督臣孔毓珣謹奏爲奏明徵臣署任內經收關稅數目事竊臣署理廣東巡撫印務帶管太平粵海兩關所有徵收稅羨數目因稅口遙遠報解未齊臣前經奏明俟報解之日另行具奏在案今查臣署任內太平關自雍正六年

七月初五日起至九月二十日止收過銀兩除照舊例應扣木稅並水脚添平
飯食等銀二千三十七兩零發司貯庫外實正額稅銀一萬一千八十一兩零
羨餘銀一萬二千零五十七兩三錢零已俱發貯布政司取有庫收移交署撫
臣傅泰收明尙有九月二十一起至二十三日計三日稅銀尙未報解又
臣署任內收過該關火耗平餘家人雜項等銀共四千七百七十九兩一錢零
俟三日稅銀解到臣即將此項耗餘等銀兩一併移交至粵海關臣署任內自
雍正六年七月初五日起至九月二十日止經收銀兩除照舊例應扣水脚
添平飯食等銀一千七百四十五兩八錢零外實正額稅銀九千五百五十九
兩八錢零羨餘銀八千三百二十五兩七錢零又臣署任內經收該關火耗銀三
千六百三十三兩三錢零擔頭船規關書公費等雜項銀五千八百四十三兩
八錢零商貨分頭銀六百九十三兩八錢零共收過雜項規銀一萬一百七十
兩零尙有瓊州雷安廉州三口俱自八月二十四日起至九月二十三日止欽
州口自七月二十四日起至九月二十四日止所收稅銀均未報解除將陸續

發司庫收俱先移送撫臣其餘俟收齊移交至臣署任內經收兩關稅銀除正額羨餘之外計兩關各火耗雜項等銀共一萬四千九百五十餘兩陸續收齊交署撫臣傳泰俟各該關一年期滿之日彙併奏解所有臣經收數目緣由合行奏聞謹奏雍正六年十一月初七日

硃批覽

正定總兵關楊鯤奏所轄五關盈餘請充正額摺 滑雍正五年閏三月

直隸正定鎮總兵官臣楊鯤謹奏爲奏明事竊臣所轄固關龍泉倒馬插箭茨溝伍關營經抽駝稅自雍正四年八月初一日起至年終止除正額外所有餘羨銀二千三百兩零臣已奏明歸公製辦兵丁盔甲帳房鑼鍋等項業蒙天恩俞允今軍裝俱各製造完竣除已另摺奏明外其自雍正五年爲始各關駝稅抽獲浮多之數雖向例額有定徵而貨物稠密國賦日有增溢豈容侵漏臣於各關營仍分委員役監守抽收不許抽多報少亦不許濫徵苛索每季獲錢易銀儘收盡解俱令充作正額臣於本年二月十六日已咨明署理督臣宜兆熊

協理督臣劉師恕等在案當經督臣牌行布政司查明叙詳雖未准有回咨而商課增額一定之理諒無他議所有徵臣將伍關營稅額餘羨請充正額咨商過督臣緣由理合繕摺奏明再雍正五年伍關營續增銀數就雍正四年八月歸公後五個月計之約略每年可增四五千兩但難預爲確定應俟雍正五年歲終合計所抽之稅定爲額例雍正六年以後照額徵收庶國賦永無隱蝕之弊矣合併奏明伏乞皇上睿鑒施行雍正五年閏二月日
硃批好秉公爲之

廣西巡撫郭鎮奏請嗣後採買銅筋一概上稅摺

清雍正六年八月二十四日

廣西巡撫臣郭鎮謹奏爲請嚴關政以除積弊事竊惟經商輸課正供所關一切借公行私之事皆足以虧國賦而撓國法惟明立一畫一之規始可以祛無窮之弊臣查廣西梧潯二關乃兩粵孔道通雲貴湖廣等省卽設廠稅卽勿論官民均應一體輸課方爲至當臣自任布政使以來屢飭該管各員凡一應過往貨船指稱將軍督撫提鎮以及司道衙門置買乞情討關者概不許徇情私

放臣仍一面遣人密訪如稅廠照舊徇情容隱者即查究題參該管各員悉已知所凜遵矣但其中實有公私難辨爲從來積習未除者乃雲南廣東福建等省採買銅劬船隻概不上稅查此項雖係委員料理大抵皆銅商包辦若無利益若輩焉肯承行名曰官銅實爲若輩貿易天下固無貿易者過關竟不上稅之理況又有採買無一定之數者往往以自販之銅指爲官物借官銅之便夾帶私銅稅廠無從考查彼則公然徑過卽梧廠一處一年之中過銅約已一百數十萬劬按以則例每百劬稅銀三錢八分四釐約應稅銀六七千兩似此綱利行私日往月來虧課將何底止臣愚以爲採買固屬官物而關稅實爲國課請嗣後採買銅劬一概上稅庶賦稅日以充裕而關政亦爲肅清正本澄源實爲簡要不寧惟是凡有採買辦公物料悉令過廠完稅以杜弊端則立法一定積習皆除官商咸知謹凜於國課大有裨益也爲此摺奏伏候皇上睿鑒以便遵行謹奏雍正六年八月二十四日

硃批該部議奏

福建巡撫高其倬奏報關稅正額盈餘銀兩數目摺

清雍正六年十一月初六日

福建總督臣高其倬謹奏爲奏聞事臣暫署理福建巡撫事務有福建海關稅務亦係巡撫衙門管理臣謹將臣所查情節據實奏聞臣查福建海關每年應額徵銀共七萬三千八百五十七兩零內除應支給書役工食銀二百五十八兩又除應解銅劬水脚銀七千兩又除應解幫庶吉士銀五十兩實應解銀六萬六千五百四十九兩零自交巡撫管理以來所有盈餘一併報解查巡撫衙門歷年案冊雍正二年共報解正額盈餘銀一十萬六千六百五十六兩零三年分共報解正額盈餘銀一十一萬六千四百一十九兩零四年分共報解正額盈餘銀一十二萬三千九百一十二兩零五年分共報解正額盈餘銀一十三萬五千四百四十兩六錢零今自雍正五年十二月二十七日爲始應計至雍正六年十二月二十六日爲一年稅期自五年十二月二十七日起至六年五月二十六日止計五個月係原任巡撫常賚管理共收正額及盈餘銀五萬四千五百三十兩零除支給書役工食銀一百七兩又未解銀三百七十一兩

零實交原任巡撫朱綱接受銀五萬四千五十二兩零自五月二十七日起至九月十八日止計三個月零二十二日係原任巡撫朱綱管理因病故未得交盤臣據管關泉州府同知張嗣昌及朱綱之管查家人各行開報并查朱綱所存報冊共收存稅務正額盈餘銀五萬二千二百三兩一錢零臣現在委員覆查并自細加查核俟核明接收奏報外再向來此正額盈餘之外每收稅銀一兩有火耗平頭各口不等每年所得盈縮不一約計兩萬一二千餘兩除支給扣存各項用費外約餘銀一萬四五千兩歷係巡撫衙門併藩司平頭銀一年約五千兩共存爲衙門公事及養廉之用此外又有擔錢一種及各雜項之銀每年約可得銀八九千兩除以一半給各項巡役工食及管關之員各項用費養廉去銀四千餘兩其餘四千餘兩亦係巡撫衙門收用計原任撫臣常賚共收過火耗銀八千五百五十五兩零除支給扣存各項用費銀三千一百四十三兩零共收用火耗銀五千四百一十二兩零又約計收擔錢等雜項銀三千兩有零此項因向來巡撫衙門不存簿賬今無細數可查原任撫臣朱綱共收

過火耗銀八千三百三十四兩零除支給扣存各項用費銀三千四百二十兩零共收用過火耗銀四千五百七十二兩零共得擔錢等雜項銀三千七百七十六兩零臣自九月十九日接管所有日收正額盈餘銀兩俱照舊例報明外其一切火耗擔錢及各雜項之銀俱令立冊簿一一登載明白臣總督載門有藩司平頭一項養廉所有稅務之火耗擔錢及各雜項銀兩除巡撫衙門有應公用之項照例動發記冊存查外餘所有火耗擔錢各雜項銀兩俱俟新撫臣到任時臣一併同正額盈餘銀兩詳細咨明移送冊交查存俟一年期滿併行報解所有情節臣謹繕摺奏聞雍正六年十一月初六日

硃批覽

是書明周鍾選今續查出五部內一部全一部六册又三部各四册
又一部各二册俱不全

晚香堂集四部 刊本

是書明陳繼儒著今續查出四部

晚香堂小品三十部 刊本

是書明陳繼儒著今續查出三十部內一十八部全一部原缺卷二
十三卷二十四又一部原缺卷一至卷十又一部原缺卷十八至卷
末又一部原缺卷二十一至卷二十三又一部原缺卷一至卷九卷
十三至卷十六又一部原缺卷四卷五卷十三卷十四卷二十四又
一部原缺卷六至卷十三又一部原缺卷一至卷三卷二十至卷二
十三又二部各四册又二部各二册俱不全

陳眉公集十一部 刊本

是書明陳繼儒著今續查出十一部內七部全一部原缺卷一至卷

三十二又一部原缺卷十三至卷末又一部原缺卷十二至卷末又一部原卷缺一至卷七卷二十九至卷末

焦澹園集四部 刊本

是書明焦竑著今續查出四部內二部全一部二册又一部一册俱不全

澹園續集五部 刊本

是書明焦竑著今續查出五部內三部全一部原缺卷四至卷八又一部原缺卷十七至卷二十七

無夢園集二部 刊本

是書明陳仁錫著今續查出二部內一部全一部原缺卷一至卷五卷八至卷末

無夢園遺集一部 刊本

是書明陳仁錫著今續查出一部

無夢園小品一部園刊本

是書明陳仁錫著今續查出一部

容臺集二十六部 刊本

是書明董其昌著今續查出三十六部內二十部全一部原缺卷一

又一部原缺卷三卷四卷七又一部原缺卷一又三部各六册又二

部各五册又三部各四册又三部各二册又二部各一册俱不全

七錄齋集十四部 刊本

是書明張溥著今續查出十四部內九部全一部六册又三部各四

册又一部三册俱不全

王忠端集一部 刊本

是書明王家彥著今續查出一部原缺卷九卷十

落落齋遺集一部 抄本

是書明李應昇著今續查出一部

隱秀軒集二十三部 刊本

是書明鍾惺著今續查出二十三部內二部全一部九冊又一部十冊又一部五冊又一部三冊又二部各八冊又二部各七冊又一部四冊又二部各六冊又三部各二冊又七部各一冊俱不全

天籟子集二十六部 刊本

是書明艾南英著今續查出二十六部內一十九部全一部原缺卷二卷三卷五卷六又一部原缺卷一卷二又二部各二冊又三部各一冊俱不全

太乙山房集三部 刊本

是書明陳際泰著今續查出三部內二部全一部一冊不全

鴻寶應本一十七部 刊本

內一部抄本

是書明倪元璐著今續查出一十七部內十部全一部原缺卷六至卷十二又一部原缺卷四卷五卷八卷九又一部三冊又三部各二

册又一部一册俱不全

崇相集二部 刊本

是書明董應舉著今續查出二部後半俱有缺頁

雪廬焚餘稿二部 刊本

是書明趙維實著今續查出二部

即山集六部 刊本

是書明沈承著今續查出六部內五部全一部一册不全

浮山前集一部 刊本

是書明方以智著今續查出一部

春酒堂集一部 抄本

是書明周容著今續查出一部

蓮鬚閣集一部 刊本

是書明黎遂球著今續查出一部

遊園擬存七部 刊本

是書明王恩任著今續查出七部內二部全一部原缺卷一又一部
七册又一部四册又二部 各一册俱不全

擬山園集六部 刊本

是書明王鐸著今續查出六部內一部全一部五十册又二部各五
册又一部三册又一部二册俱不全

天外談七部 刊本

是書石廬著今續查出七部內三部全一部二册又三部各一册俱
不全

田間文集三部 刊本

是書錢澄之著今續查出三部

田間詩集五部 刊本

是書錢澄之著今續查出五部內三部全一部二册又一部一册俱

不全

獨濺堂稿一十九部 刊本

是書陳恭尹著今續查出一十九部

白菴山人集四部 刊本

是書閻爾梅著今續查出四部內二部全一部各一册俱不全

一木堂詩集一部 刊本

是書黃生著今續查出一部

寒支詩集二部 刊本

是書李世熊著今續查出一部

寒支初集三部 刊本

是書李世熊著今續查出三部內二部全一部原缺卷一卷二

寒支二集七部 刊本

是書李世熊著今續查出七部內六部全一部一册不全

亭林集七十七部 刊本

是書顧炎武著今續查出七十七部內六十二部全七部原缺詩集

又八部原缺文集

古處齋詩文集五部 刊本

是書陳祖法著今續查出五部

山曉閣明文續選十六部 刊本

是書孫琮選今續查出十六部內十三部全一部原缺卷七卷八又

一部原缺卷三至卷八又一部原缺卷五至卷八

近代詩鈔二部 刊本

是書周京輯今續查出二部內一部全一部原缺卷六以下

江左三家詩鈔十三部 刊本

是書錢謙益吳偉業龔鼎孳著今續查出十三部內四部全一部原

缺錢詩上卷又二部各二冊又六部各一冊俱不全

嶺南三家詩選八部 刊本

是書梁佩蘭屈大均陳恭尹著今續查出八部內四部全一部原缺
卷九至卷十六又一部原缺卷十七至卷二十四又二部各原缺卷
九至卷二十四

道濠堂集三部 刊本 內一部抄本

是書屈大均著今續查出三部內一部全一部原缺卷一至卷四五
言古七言古又一部原缺五言古

翁山詩集十八部 刊本 內一部抄本

是書屈大均著今續查出十八部內十四部全一部原缺卷二至卷
六又一部原缺卷六至卷八又二部各一册俱不全

翁山詩外十一部 刊本 內一部抄本

是書屈大均著今續查出十一部內二部全一部原缺卷十至卷末
又一部原缺卷十一卷十二卷十五至卷末又五部各二册又二部

各一册俱不全

翁山詩略四部 刊本

是書屈大均著今續查出四部內二部全又二部各一册俱不全

翁山詩外選略五部 刊本

是書屈大均著今續查出五部內四部全一部一册不全

翁山文鈔三部 刊本

是書屈大均著今續查出三部

翁山文外六部 刊本

是書屈大均著今續查出六部內三部全一部原缺卷三至卷末又

一部四册又一部一册俱不全

徧行堂集二十六部 刊本

是書釋澹歸著分正集續集今續查出二十六部內正集九部全一

部原缺卷十九至卷二十三又二部各原缺卷四十七以下又一部

原缺卷一至卷二十六卷三十至卷三十二又一部六册又二部各

二册又一部一册俱不全又續集八部全一部另板詩二册不全

牧齋尺牘十四部 刊本

是書錢謙益著今續查出十四部內十一部全三部各一册不全

廣東新語十三部 刊本

是書屈大均著今續查出十三部內七部全一部原缺卷八至卷十

一卷十六至卷十九卷二十二至卷二十四又一部原缺卷一至卷

八卷二十五至卷二十八又一部七册又一部三册又二部各一册

俱不全

呂留良講義二百六十七部 刊本

是書呂留良著今續查出二百六十七部內二百十三部全三部各

八册又一部七册又三部各六册又十三部各五册又十一部各四

册又七部各三册又十部各二册又六部各一册俱不全

晚村語錄四十四部 刊本

是書呂留良撰今續查出四十四部內二十部全一部十六册又一
部十一册又二部各十册又四部各九册又三部各八册又二部各
七册又一部六册又一部五册又一部各四册又二部各二册又五
部各一册俱不全

晚村文集三部 刊本

是書呂留良著續查出三部

慙書十部 刊本

內一部
抄本

是書呂留良所作時文今續查出十部

喜逢春一部 刊本

是書不著編造人姓名今續查出一部

以上一百八十二種內重二千八十九部共計二千二百七十一部間
有觸碍字句俱應行銷燬

中華民國二十年五月出版

文獻叢編第十一輯

編輯所 故宮博物院

發行所 故宮博物院出版發售室
電話東局一六〇九

印刷所 和平門內後細瓦廠
和濟印刷局



費		郵		價目	
每本	一分	本市	外埠	五	角
每期	壹角			二元七角	
每本	二分五	外埠	外國	五元二角	
					全年十二册

本市 上海 天津各大書店均有代售

文獻叢編

